

4

HARVARD COLLEGE LIBRARY  
FROM THE  
HARVARD-YENCHING  
INSTITUTE  
SEP 30 1928

Ch L 3145.0272,81

商  
卸  
具  
繫  
主  
志

丘縣志卷之十

立武功

自文武分途而人材遂小漢之材官可為丞相晉  
之名士多堪領軍唐以後遂鮮焉故列武功自唐  
始邑人如曹僕射及朱保國父子雖非韓彭比而  
顯有名跡以功名始終亦堯鰲之錚錚者也今聞  
左好以子弟習武科而翰畧不甚之究毋乃徇名  
而忘實乎賢者宜自反矣

唐

哈佛大學  
哈佛燕京  
圖書館  
珍藏印

前

卷之十

武功

曹華宋州楚丘人始從宣武軍縛亂將李迺送闕下  
節度使董晉署爲牙將吳少誠叛華戍襄城有功  
憲宗初累拜檢校右散騎常侍後討吳元濟以功  
封陳留郡王會兗海軍亂觀察使王遂詔華往  
代華至以計悉誅亂者千二百人海沂之人怵焉  
自李正己盜齊魯以來俗益汙驚華乃下令曰鄒  
魯禮義鄉不可忘本乃身見儒士春秋祀孔子祠  
立學官講誦斥家貲佐贍給人乃知教成就諸生  
仕諸朝者甚衆鎮定人殺田弘正華亟請以本軍

進討不從進檢校工部尙書就充節度使李齊叛  
取宋州華不待命以兵逆擊破之齊平進檢校尙  
書右僕射卒贈左僕射華雖出戎伍而動必由禮  
宋愛重士大夫不恃貴以倨人至厮豎必待以誠信  
明人以爲難

宋

李緯楚丘人叅政昌齡從子起家三班借職杜衍薦  
爲閭門祇候鎮戎軍瓦亭砦都監積勞累遷至河  
北緣邊安撫副使韓琦薦知保州以左驥驥使榮

州刺史知雄州治兵頗嚴不事厨傳數與宦者爭利害積公使錢貲米三千斛爲常平倉奏下其法于他州遷西上閤門使留再任卒子師中見名臣傳

明

朱永字景昌本歸德州西曲睢鄉人籍夏邑祖真以靖難功官中都留守司指揮僉事父謙歷官後軍都督府左都督佩鎮朔將軍印鎮宣府以禦鹵功封撫甯伯卒謚武襄永身長偉貌顧盼雄偉景泰

中嗣爵英宗復辟召置左方可以腹心成化初總十二團營掌右軍府事同尙書白圭請平劉千斤之亂進侯爵又以遼東功封保國公歷鎮宣府大同前後凡八佩將軍印累加太傅弘治初進太師卒追贈宣平王謚武毅子孫世襲迄于明亡

陳亨爲人勇敢有膂力累從戰伐有功永樂初授金吾右衛指揮使歷陞後軍都督府僉事同知復陞前軍都督府左都督

熊世錦歸德衛指揮同知以捕盜有功遷汝甯府守

備又以擒賊功陞都司累官至後軍都督府左都督歷宣府固原總兵

本朝

高第字漢卿本陝西榆林人故明時以指揮從軍累遷至鎮守山海關總兵興朝定鼎率先投誠仍以總兵官隨征南下定河南江南諸郡縣平賊寨一千七百餘論功以左都督鎮守河南開歸等處駐襄城撫綏士卒地方安堵襄故臨汝河值水汎濫距城尺許第虔禱于神願以身葬魚腹爲萬民

請命不移時水退三舍邑賴以全民多異焉順治辛卯又破山東賊李化鯨紀功授二等阿達哈哈番世襲後以病乞骸加宮保致仕遂家于商邑偃息林泉者十有八年而卒葬郡城南子孫遂世爲商人

趙應奎自言商丘人族孤年十八被流寇掠入楚起于戎伍累遷至兩江總督中軍副將後分鎮江西之袁州破賊兵加都督同知充總兵官又以出首吳三桂僞劄于世職拜他喇布勒哈番又加拖沙

喇哈番耿逆寇袁應奎率諸道兵大破之進二等  
阿達哈哈番後從大軍進取湖南有功陞提督廣  
西左江總兵官卒于軍贈太子少保謚襄莊

周琬字肯衛明尙書士樸孫舉人業熙子尙書父子  
俱以寇亂殉難琬性豪邁善騎射喜談兵順治壬  
辰舉武科進士授廣東鎮標旗鼓守備討老香山  
羅定州諸寇擒賊首王興羅境悉平會裁缺補天  
津右營守備遷山東萊州左營都司時萊陽于七  
倡亂海右震動而其黨李帽子尤雄黠犯平度琬

率師拒之敗之于夏計店再殲之于徐里進克藍  
坻賊巢于七遂遁去後琬舊帥侯襲曾鎮廣東素  
知琬題請偕行遷潮鎮遊擊甲寅之後滇黔閩粵  
連兵倡逆琬在潮平巨寇丘輝敗海賊楊金目取  
井洲征遠濠俱有戰功以抑于忌者不獲敘遂自  
免歸琬平生忠誠事上廉惠馭下而果敢善戰得  
人死力有古名將風乃位不稱才賞不酬勛君子  
惜之

吳友名字輔臣初以材武從戎授歸德中軍守備從

征有功遷江西鎮標遊擊屢敗劇賊進叅將改山東膠州營尋以事謫吉安守備巡撫董衛國奇其才奏補撫標中軍遊擊甲寅吳耿之叛董撫進總督江西軍務復奏友名爲督標中軍副將時江右所在被賊友名戰故里橋戰新昌又戰鳳凰山又戰羅浮所至克捷斬馘無算收復名城十數加都督同知旋進右都督從大兵征黔擒斬僞總兵劉宗聖張茲文遂克鎮遠府進左都督逆平敘功子世襲拖沙喇哈番乙丑以疾乞休居于宋之西村又五年而卒年七十有六友名身經百戰摧鋒陷陣雖多首功而凡入賊境務保全良民未嘗枉殺故以壽考令終孫枝蕃昌人謂其有陰德云子貢字禹來以武舉從軍進討吳逆身先士卒功未敘而卒貢弟灝字素來官廣西西林知縣撫綏瘴鄉多惠政亦以勞瘁歿於任

張岳字嵩如本陝西延川人父宦遊於汴因徙居商丘遂爲商丘人岳狀貌英偉猿臂善射多智畧落拓不治生產年甫踰冠從軍於豫省提督王永譽

麾下永譽器之調鎮安慶岳隨征婺源賊有功遂  
授軍官後永譽遷鎮廣大將軍岳為其標營千總  
以年滿應遷又從墾荒例得授副將忽格于部議  
鬱鬱不自得遂叩閭陳情得召見 上奇其貌

試之技勇果超倫等

天顏大悅遂授古北鎮

右營遊擊丙子隨征噶爾旦奮勇當先不避艱險  
凱旋遷靈州叅將尋改固原又遷陝西督標中軍  
副將已卯西甯鎮總兵闕 特旨遷岳在鎮二

年邊夷讐服軍民懷畏以疾遽卒年祇四十有一

中朝震悼贈卹有加今官其子志浩為侍衛

隱逸

遜世無悶贊易稱之隱逸之品人物中未易當也  
李溫陵以五等別其目信夫邑無名山勝水可作  
考槃適軸而修名釣奇博捷徑于終南者又君子  
所不道也聊著一二以存真品

宋

戚同文字同文宋州楚丘人幼孤事祖母以孝聞從  
楊懋授五經晉末喪亂絕意祿仕且思見混一遂



以同文爲名氏慙病將死以家事托同文慙卒爲  
 葬其三世數喪將軍趙直高其行爲築室聚徒人  
 不遠千里而至其門人登第者五六十人宗度許  
 驥之徒皆踐臺閣同文純質尙信義不積財不營  
 居室曰人生以行義爲貴焉用此爲好爲詩楊徽  
 之嘗與酬唱旣卒門人私謚曰堅素先生二子維  
 綸維累官尙書職方郎中綸自有傳

趙俊字德進宋城人紹聖四年進士官至朝奉郎隱  
 居杜門雖鄉里不妄交徐處仁素與俊善及爲相

鄉人多見用俊未嘗往求建炎末士大夫皆避地  
 東南俊獨不往曰但固我所守爾死生命也避將  
 安之劉豫以俊爲虞部員外郎辭疾不受以告身  
 畀其家卒郤之凡家書文字不用豫僭號但書甲  
 子而已後卒贈承直郎

本朝

侯性字若孩邑人侯執介之養子執介妻田通政珍  
 女田無子少育性爲子及長狀貌魁梧腦後有異  
 骨人目之爲封侯相爲人豪放博達補博士弟子

錚錚諸生間尤善騎射自負有文武才明末從軍于南累功拜爵後棄官養母隱于吳之洞庭山母終遂葬焉性在吳與故明之遺臣遺老如錢尙書謙益杜將軍弘埴姜給事採輩共相引重稱遺民寓公歿于吳其子北還徙鄆陵今亦泯然矣

張昉字于東與弟翮皆爲諸生有文名崇禎丙子中鄉試鼎革後遂絕意仕進隱於河濱茅屋數椽不蔽風雨溷跡田野間人無識者從不入城市唯侯方岳歿昉徒步入城一哭之哭卒卽返邦大夫求

一見而不可得司李符應琦嘗造其廬輒避去一日得相值北面拜床下稱弟子嘗欲援其子入座昉聞之艷然曰公家名器豈司李作人情物耶禁其子不許入試或邑令有念昉者遺之粟帛亦不受蔬食飲水充然自得嘗語徐隣唐曰父母生我清靜之身天地于我靈明之心當以清靜之身還之父母靈明之心還之天地如是而已所著有四書正晚號匏客間爲古詩陶然適情有淵明康節遺韻翮字鳧客性尤孤介居平嘗超然有塵外想

食餼于庠滿歲當出貢弗就一日南遊不知所終  
 張暉吉字光符故明諸生性至孝品行方嚴甲申之  
 後卽謁辭先師廟自禡其衣巾于明倫堂不復應  
 舉退號逸民作陋婦傳以見志見人雖盛夏必裹  
 巾著布袍人或請其弛幘者暉吉曰我不能不冠  
 裳以對人也其所志如此足跡不入城市者十四  
 年而卒

忠烈

臣以忠稱子以孝稱臣子之不幸也而大難當前

無此致命遂志之士綱常亦安賴哉商之先民有  
 見危授命者若而人亦增光地靈多矣後世安敢  
 忘乎

周

仇牧宋大夫南公葛與閔公博于蒙澤怒而搏殺之  
 牧聞君弑趨而至遇之門手劍而叱之萬擊殺牧  
 碎其首齒著乎門闔君子曰仇牧可謂不畏強禦  
 矣

元

盛昭歸德人由學官累遷淮南行省照磨遣入高郵諭張士誠士誠拒不聽拘諸舟中昭語所從吏曰吾之止此有死而已旣而官軍逼高郵士誠投昭以兵使拒官軍昭叱曰吾奉命招諭汝汝拘留詔使罪不容誅又欲吾從汝爲賊耶罵不絕口賊怒先剗其臂肉而後磔之

明

張彪歸德衛指揮張金家丁嘉靖壬午山東萊蕪賊王鏗寇河南諸郡邑金與賊戰敗失馬彪以馬讓

金步殿于後爲亂兵所害副使王縱祭以文

許經州醫學訓科王鏗之變受州檄統民兵拒賊戰敗死之提學副使楊維聰旌之曰義士王縱爲文祭之

許勇歸德衛百戶嘉靖三十六年五月奉調征倭至泗州義井山奮身力戰因隕賊鋒兵部以死事忠義題陞其子三顧爲千戶世襲

殷弘基衛指揮崇禎乙亥流寇攻堤與賊戰被執不屈斷舌剖心而死事聞贈遊擊將軍

周訥字中言歸德衛世襲指揮明季以軍官出征屢立戰功壬午寇攻郡城與官紳拒守城陷被擒罵賊不屈而死

周士美字君彥少以文名受知于郡守鄭三俊天啟甲子由選貢領解壬午城陷不屈死又周士哲及喬陞皆諸生有文名以破城殉節

張渭字伊人慕徐渭之爲人遂名渭自號狂生性嗜酒醉後談天下事滔滔不倦爲文敏妙日成十餘篇嘗試于有司而名次居後自袖其卷爭之提學

使者潘曾紘前曾紘取閱之曰子文誠善余猝未辨也拔置高等數年復袖其文爭之於學使任贊化贊化怒黜之渭大噪而郡之縉紳先生亦有言渭實名士者乃復其故渭旣摧挫久且將老庚辰徐作霖罷會試歸脩春社於吳伯裔家醉謂其座人曰吾馬周也天下方有事胡不用我天下且不  
知文士焉知我遂舉聲大客皆以爲狂作霖曰汝輩席祖父餘業日衣統絰何飽數椀肉耳大亂將至吾儕旦暮死謂渭狂何也伯裔兄弟侯方域亦皆

哭遂慘沮不樂而罷壬午十城破時賊以刀砍之頤  
張且斷滑猶右手灑其血再上血以左手承頤徐步  
行啞啞罵不止又一賊自後至砍以刀乃仆而死  
史懋明崇禎丙子武舉素有智畧壬午分守外城西  
北敵臺城潰不屈死

李景華邑諸生有節崇禎八年流寇猝至景華分  
守外堤躬冒矢石備禦有勞十五年闖賊至郡城  
陷被執不屈死子從 恭天啟丁卯舉人少有文望  
與吳伯裔伯禧兄弟 友善壬午之亂二吳同殉國

難褫恭撫其遺孤世振妻之以女入泮成名人多  
其義

劉駿生拔貢生少有文行壬午之亂亦以不屈死  
本朝

劉超鳳字元修爲人孝義敦樸鄉里推重少諳韜畧  
習武科舉辛丑進士授福建詔安營守備討蒐卒  
乘訓練有方大帥倚重之甲寅耿精忠叛全閩煽  
動超鳳獨仗節不屈逆黨迫之遂自刎死有兄超  
萃字子彬諸生以學行知名爲後進所宗

孝友

孝弟庸德也而後世作史者每別立為一則豈非以三物六行之教衰而士夫之行誼多不可問乎苟父母昆弟無間言雖後門寒峻紀事者敢或遺乎斯集也庶幾近之

漢

韓伯俞梁人性至孝母嘗笞之泣母曰他日笞子未嘗泣今泣何也對曰他日笞常痛今笞之力不能使痛知母年衰矣是以泣也

隋

翟普林楚丘人事親以孝聞州郡辟命皆不就躬耕色養鄉鄰謂為楚丘先生父母疾親易溲濕不解衣者七旬及卒廬於墓側負土成墳盛冬不衣繒絮惟著單縗而已當廬墓時有犬隨之普林哀犬亦悲號又有二鵲巢其廬馴狎無所驚懼大業中司隸巡察奏其孝感擢授孝陽令

唐

程袁師宋州人母病十旬不褻帶藥不嘗不進代弟

成洛州母終聞訃日走二百里因負土築墳貌癯人不復識常有白狼黃蛇馴墓左每哭羣鳥翔鳴永徽中刺史狀諸朝詔吏敦駕既至不願仕授儒林郎還之

宋

侯義楚丘人貧無產傭田以事母母卒葬不一壙晝則負土築墳夜則慟哭柩側踰年墳開木連理瓜異蒂同實又有野鴿馴而不去嘗遇盜劫其衣服既而知爲義物悉還之又元時有葛祥張德成張

遜王注劉弼俱歸德人皆以居喪廬墓詔復其家

明

呂仲和少喪父事母路氏至孝路喪明百藥罔療仲和每旦舐之目遂愈及母卒廬墓三年鳩雀馴集墓右正統初詔旌其門

楊敬父昱洪武間死於陣時敬十歲聞訃痛踊思求父遺骸不果取衣冠葬之事母文氏溫清服食意所向無少違每閱戰陣事輒流涕不已時以王哀擬之後母卒方殯在堂而西隣不戒於火將及柩



敬仰天大哭俄風反火息鄉里異之事聞詔旌其門曰孝行子懋中正統辛酉鄉試仕至山西代州知州工於書敬歿懋亦廬墓三年人稱其世孝意任貴父恭義早卒貴恒以不逮父養爲恨事母孫氏曲盡孝敬母年八十終貴哀毀骨立旣葬廬墓三年詔表其門

沈忠素以孝稱母病籲天願減己年益母及父病亦如之父母各愈延壽人以爲孝感及歿忠送之禮廬于墓者六年成化間旌表後忠患癱其長子

潑吮之及卒季子瀚又廬於墓側人謂一門三孝徐鳳翥永明令會之子事母以孝聞初會以就官卒於京邸後鳳翥欲就試有司母曰忘汝父爲功名累耶鳳翥瞿然遂絕意仕進衡門教授布衣蔬食以終其身郡守畢用聞其賢甚禮重之

侯循禎字在田幼孤事母以孝聞因母故哀號慟哭致失明後數年忽有神人過禎家曰君孝友人也吾當醫之授以藥餌日尋愈後中鄉舉任盧龍知縣居官五載亦有惠政

郭來鳳諸生志行狷介家無擔石舌耕奉親督學使者旌其門曰孝友醇儒

李文榮家貧母病篤割股以奉其母卽愈邑令旌其門

朱國甯儒士有孝行屢舉鄉飲府縣皆旌其門

潘思恭諸生孝友立躬德行素著闔邑景重督學使者何應瑞旌之曰家無間言里有廣譽

田實穎諸生因父病思食魚入水求魚溺死其妻氏痛夫之亡不食七日亦死府縣旌其門曰孝烈

本朝

李紹祖胡憲副嵩族孫紹祖十歲而孤其弟繼祖甫

週辟母張氏苦節紹祖業醫養母崇禎之季闖賊

破歸郡紹祖負其母以逃而弟繼祖爲賊所掠不

通音問母哭之失明紹祖籲天禱祝如得弟願長

齋終身每夜必祝輒呼天痛哭如是者數年一夕

夢神告之曰汝弟在桃源爲僧甚思家三日後當

有信至越三日果如神言紹祖亟趨桃源遂取弟

歸母盲已十年二目忽明衆以爲至誠所感

張乃葵張守德張乃知事寡母田氏至孝母歿兄弟三人廬墓三年足不入市

周懷用陳家集鄉民事親以孝聞邑令旌其門

宋森字干木貢生性至孝八歲而孤哀毀踰成人寇亂躬負母渡河得脫於險事母誠敬四十年如一日母歿森已五十餘猶作孺子啼森平生慷慨任事急人之難甚於己雅好園林聲伎而治家嚴肅平門庭秩然年八十五卒子斌官南陽郡博孝友承家捐資創建二賢祠魁樓並立義塾尤爲邑人所稱

徐時行字長仁其先自新安徙商丘父工于醫壯年遽歿母王氏有賢行勵志守節時行性至孝色養寡母侍奉尤摯讀書入太學試銓部得除縣佐念母老不仕歸而繼父之業以青囊濟人人沈痼飲其刀圭輒起貧者不惟不計利而且以藥石施之教其仲弟亦習醫術如其兄季弟及子皆儒生時行家庭雍睦里黨稱仁乃年亦不中壽人共惜之

卓行

采春華而遺秋實君子譏之矧介特之操慷慨之

行可以振頹勵俗者乎若夫匹夫慕義何讓衣冠  
與人爲善甯恕毋苛也

漢

桓畢字文林一名巖龍亢人父鸞見前傳畢行修志  
介姑爲司空楊賜夫人初鸞卒姑歸甯赴哀將至  
止於傳舍整飾從者而後入畢心非之及姑勞問  
終無所言號哭而已賜遣吏奉祠因縣發取祠具  
畢拒不授每至京師未嘗舍宿楊氏其貞快若此  
仕爲郡功曹嘗舉孝廉有道方正茂才三公並辟

皆不應初平中天下亂避地會稽遂淨海客交陞  
越人化其行至閭里不爭訟後爲凶人所誣死千

合浦獄

明

李安徐海俱歸德人正統中歲饑各輸粟麥一千二  
百石以賑有司上其事詔旌爲義民

周琳州諸生貧甚僦居學舍中日訓童子數人童子  
家有饋所饋溢於學業卽一介亦還之時值久雨  
炊床足併日而食學正徐化以廩米三斗給琳琳

曰師養廉資也某何功弗受州衙請爲子師避去不肯往後及妻俱饑病死無怨悔其狷介如此

李芳字庭光持身耿介言行不苟間聞有不直者懼芳知曰寧辱公府不可使李君見也三黨有貧者輒賑給之人有厄於難必思拯濟之而不責報以仲子嵩貴封中書舍人後晉兵部員外郎戒其子曰正而行勿渝而節曰菽水固吾樂也否則曰五鼎吾弗享矣

徐涉字淮東萬曆己卯舉人官山東黃縣知縣壬寅之歲黃河南徙圍歸德又值霖雨水不及堤者尺許勢在危急涉令人解衣囊土以塞隄口計其值以布償之水不溢入闔郡賴以生全

宋暘字樂庵爲人孝友其弟以飲廢產復出己產平分之丁家道口田氏子孫零替四喪不克舉暘具棺以葬嘗買婢憐其母子分離因捐價遣歸年近八十復舉一子長子沾見前傳沾子權本朝仕至大學士今子孫益貴顯人以爲暘積德之報

侯瑀字君珮父進有隱德家世業農至瑀始學於文

弗售嚴課其子執躬及孤姪執蒲先後成進士俱  
至列卿瑀性至孝執躬官中翰父進猶健七箸曾  
一遊燕邸一夕忽心動趣裝急歸重趼七日抵家  
越三日而父卒及于飯舍人以爲孝感後執蒲令  
甯津亦一至其官舍往返不以一輿一馬煩邑人  
執蒲爲御史按甘肅有罪弁持千金賂瑀者瑀叱  
卻之以子貴累封至通奉大夫從不干謁郡邑郡  
大夫多不識其面卽鄉飲舉請大賓亦謝卻之曰  
我何德足以教讓也治家儉約如寒士而鄉邦有  
災祲不惜傾廩以賑若修理橋梁堤路之屬捐費  
不貲平生坦懷大度不修舊怨華亭董其昌論其  
修謹似萬石君德量似陳太丘王彥方家訓更出  
顏柳諸家之右人以爲信而有徵長子執躬見前  
傳次子執中

執中字覲宸少勤學爲文見二兄俱貴不欲以科  
第妨寒畯遂罷應舉入貲爲郎官光祿寺署丞平  
生好爲人排難解紛而無所取尤急公樂施邑侯  
以縣學頽敝延紳士議修衆遂巡囑囑執中獨慨

然任之遂費至千餘緡他公事之捐貲成者不可枚舉壬午城圍急乘一騾突出北門爲賊所得擁之入營不屈遇害有書賈胡慎初目擊其事

宋枏尙書纁冢孫爲人寬厚長者終身無怒詈之聲僕從有大過逐之而已未嘗加鞭朴也自奉儉約一葛衣廿年如新而慷慨好施佃人有逋租至五百餘金貧不能償火其計簿有隣人張老數喪不能舉出金助之凡里中有死喪無主不克瘞者捐地施棺俾得掩骼不可枚舉今其孫枝蕃昌雖尙

書纁之德澤未艾而在枏亦有所培云

張雲翔諸生廉直敦樸好義樂施閉戶讀書足不履公庭巡按丘御史曾旌其門曰一國善士年至九十終

董雲龍儒官爲人醇樸有行誼嘗置義田以供祭祀修杠輿以濟行人捐地爲義塚施棺以掩枯骨沈太保鯉及鄭太守三俊皆重之

屠應期諸生忠厚長者篤於行誼與姪不析產待嫂如其母郡人稱之

周郁文諸生孝友多信義弟子從學者甚衆沈太保  
鯉雅重之有人懷金謁郁文有所干請郁文曰人  
可誣枉上天難欺卒拒之

張奇蘊字養冲貢生任山西孝義訓導遷高平教諭  
時河東寇警招撫難其人奇蘊能資金至賊壘慰  
諭晉土以甯兩院交薦奇蘊不樂仕引疾歸家居  
不畏不侮邦人矜式飲於鄉者三孫瑄中鄉舉

劉柎字思劬世饒於財俗稱爛錢劉家兄格見文苑  
傳柎以太學生官文華殿中書性友愛與兄析產

勾得腴者皆讓之兄崇禎庚辰大饑斗米千錢柎  
輸千石以賑活人甚衆嘗大旱代有司禱于高辛  
井大雨立至浹數百里流寇起柎懸重賞募士守  
城又捐數千緡修外郭里人至今稱其義

李生春邑之西南鄉人薄有田廬而好行其義平生  
還遺焚券之事甚多其不取伯父金以授伯女及  
買宅知宅主不忍移居還券而不取值又不令嘉  
善人鬻子婦償負三事尤著睢州田蘭芳爲作傳  
本朝



楊麒字孟樸武進士初授海門衛守備累遷至浙江掌印都司使歷官俱有惠績居鄉尤好行其德常延名士在家塾凡里中貧寒子弟供其膳脩勸之誦讀成就者頗衆又於城東買地一區置義塚以葬孤貧之無墓者遇人困厄及戚友婚喪不吝資助里人述其事甚多

盛夔發西關民少孤年十五叔與析產誼應均分夔發以什之七與叔而自取其三日叔食指衆我寡也及長好行其德有友趙振畧貧不能婚夔發助

之三十金又有牛金峰僧人性德及朱大漢俱以病廢夔發皆養之數年而死各爲之棺殮以葬一日有一病夫在其隣人門首夔發見其憊扶至家養之或謂之曰人病已篤萬一死則殃及于養者奈何夔發曰我以恩及彼彼必不我害也旣而病夫果愈拜謝而去因好善樂施晚年致傾其橐今厥子工文遊庠頗克家能復故產人謂夔發之報尙未艾云

張次房字映垣邑諸生早慧能文性孝友寬厚以學

行推爲大師弟子日進所得束脩羊供甘旨外卽以分給諸羣從有一族惡素與次房家爲仇後其人貧極一日遇諸塗哀告其窘狀次房解衣與之又一遠人買遷干宋曾貸次房二十金折閱而逃其所負亦甚衆後是人潛來竊妻子去遂爲衆所扼將執之官次房憐之還其券併爲衆解紛其長者類如此又有李一鶴者亦諸生家貧遂移居蔡氏故室掘地得金意此金必蔡姓埋者急還其家而蔡氏之妾果以亡金欲投繯矣值金還得生人高其義又邑中凡大工大役有可興利除害者一鶴必請之當事雖布衣諸生而隱然爲桑梓造福邑令嘗旌之

陸喆字爾知本蘇州吳縣人父自毫徙宋遂家商丘自幼穎敏千言立就有名諸生中久之以歲次貢于廷授蘭陽訓導未幾引年歸喆有三兄皆前歿撫其遺孤咸有恩誼仲兄死於寇子鍾呂甫八齡喆教育之蚤登第仕至廣西平樂知府鼎革初充徐間餘寇未平將軍倖掠良人子女無算喆說主

將聽民識認給主賴以骨肉完聚者不啻數百人  
又睢陽有以名家女爲健兒所獲喆出金贖之歸  
其家女兄以金還喆亦不受其好義類如此晚年  
頗好著述尤耽吟咏貧不能梓見於世者寡而  
劉十葉少爲孤童奮志勵學補博士弟子順治末遊  
夏邑時有寇警夏令張所志訪以城守之策十葉  
爲敷陳條畫多見採納夏城巒序久敗十葉率先  
捐百緡爲邑人倡宮墻頓修復又嘗置義塚瘞枯  
骨其樂施好義之事非一

流寓

自梁孝王招致公孫鄒枚之屬而梁園之客遂甲  
天下唐宋之稱寓公者亦皆當世之巨人長德也  
金元而後寥寥焉近代亦有一二徙在邑者其人  
可紀亦何敢畧云

漢

鄒陽齊人也仕吳王濞吳王陰有邪謀陽上書諫不  
聽去之梁從孝王遊陽爲人有智畧慷慨不苟合  
介于羊勝公孫詭之間勝等疾陽惡之孝王孝王

怒下陽吏將殺之迺從獄中上書書奏孝王立出之卒爲上客及梁事敗孝王恐誅迺令陽求方畧解罪于上陽素知齊人王先生多奇計往見語以其事王先生曰子往見王長君長君者王美人兄也陽因客見王長君曰竊聞長君弟得幸後宮今袁盎事卽窮經梁王恐誅如此則太后拂鬱無所發怒切齒側目于貴臣矣君誠能爲上言之得毋竟梁事長君必固自結于太后太后厚德長君入于骨髓而長君之弟幸于兩宮金城之固也願長

君深自計之長君曰諾乘間入而言之事果得不治

枚乘淮陰人爲吳王濞郎中吳王謀逆乘奏書諫之不內乘之梁從孝王遊梁客皆善屬辭賦乘尤高焉

枚臯字少孺乘之子乘在梁時娶臯母爲小妻乘之東歸也臯母不肯隨乘怒分臯數千錢留與母居年十七上書梁共王得召爲郎後之長安上書北闕自陳枚乘之子上得之大喜召拜爲郎上有所

感輒使賦之爲文疾受詔輒成世謂高文典冊用相如飛書走檄用枚臯

嚴忌會稽人與鄒陽枚乘等俱仕吳皆以文辯著名久之吳王以太子事怨望不朝鄒陽書諫之吳王不內其言是時梁孝王貴盛亦好士於是忌等知吳不可說皆去之梁從孝王游

司馬相如成都人事景帝爲武騎常侍非其好也時梁孝王來朝從游說之士鄒陽枚乘嚴忌相如見而悅之因病免客游梁乃著子虛之賦會梁孝王薨相如始歸蜀後武帝時奏上林賦拜爲郎

中屠蟠陳留外黃人京師游士范滂等非議朝政自公卿以下皆折節之太學生爭慕其風以爲文學將興處士復用蟠獨嘆曰昔戰國之世處士橫議列國之君至爲擁篲先驅卒有坑儒焚書之禍今之謂矣乃絕迹于梁碭之間因樹爲屋自同傭人居二年滂等果罹黨錮

唐

李勉字立卿鄭惠王元懿曾孫少貧客梁宋與一士

共寓土病且死出囊金百兩曰左右無知者幸公爲我營後事餘金奉之勉許諾及葬置金墓中後數年勉尉開封士之兄弟謁勉共至墓所出金付焉從肅宗於靈武擢監察御史時武臣崛興藐法度大將管崇嗣背闕而坐勉劾其不恭帝喜曰吾有勉朝廷始尊累官檢校司徒同平章事封汧國公德宗嘗謂勉曰衆云盧杞姦邪朕顧不知謂何勉曰天下皆知而陛下獨不知此所以爲姦邪也時躉其對居相二歲辭位卒贈太傅謚曰貞簡

高適字達夫渤海人少落魄不治生事客梁宋間宋州刺史張九皋奇之舉有道科中第調封丘尉不得志去客河西河西節度使哥舒翰表爲掌書記祿山亂召翰討賊卽拜適左拾遺佐翰守潼關翰敗天子西幸適走間道及帝於河池極言兵事帝領之俄遷侍御史擢諫議大夫負氣敢言權近側目累遷西川節度使召還爲刑部侍郎左散騎常侍封渤海縣侯卒贈禮部尙書謚曰忠適尙節義遭時多難以功名自許年五十始爲詩卽工其貽

書賀蘭進明史救梁宋以親諸軍與許叔冀書令  
釋他憾未渡淮移檄將校使絕永王璘求各自白  
君子以爲義而知變

宋

趙隣幾字亞之鄆州人家睢陽少好學能屬文嘗作  
禹別九州賦萬餘言人多傳誦周顯德二年進士  
解褐除秘書省校書郎歷宋州從事太平興國初  
召爲左贊善大夫直史館郭贊宋白交薦之遷知  
制誥隣幾爲文浩博每構思必斂衽危坐成千言

始下筆屬對精切致意縝密時輩咸推服之淳化  
中叅知政事蘇易簡對太宗言隣幾有追補唐實  
錄若干卷隣幾卒卽命直史館錢熙乘傳往取其  
書得隣幾所補會昌以來日歷二十六卷及文集  
三十四卷所著鰕子二卷六帝年畧一卷史氏懋  
官志五卷并他書五十餘卷來上皆塗竄之筆詔  
賜其家錢十萬

杜衍字世昌越之山陰人擢進士甲科除揚州觀察  
推官改著作佐郎歷知乾州有惠政徙知鳳翔府

二邦之民爭于境上行爲治謹密不以威刑督吏然吏民亦憚其清整仁宗特召爲御史中丞累拜同平章事兼樞密使衍多知本朝故實善決大事好薦引賢士而凡內降恩率寢格不行詔旨積至十數輒納帝前上嘗謂諫官歐陽修曰吾居禁中有求恩澤者每以衍不可告之而止者多於所封還也用是近倖小人多不悅遂以其婿蘇舜欽事罷知兗州爲相纔百二十日慶曆七年上表請還印綬以太子少師致仕皇祐元年遷太子太保召

陪祀明堂詔都亭驛設帳具几杖待之稱疾固辭連進太子太師封祁國公衍清介不殖私產旣退寓南都凡十年第室卑陋才數十楹居之裕如也出入從者十許人烏帽皂履緹袍革帶或勸衍爲居士服衍曰老而謝事尙可竊高士名耶是時同寓南都者太原人王渙官禮部侍郎年九十雲中人畢世長官衛尉司農卿年九十四始平人馮平官駕部郎中年八十七沛國人朱貫官兵部郎中年六十八各致仕與衍號睢陽五老結社賦詩不



于時事人敬之如著蔡至繪像以傳錢明逸爲序  
云蹈榮名而保終吉却貴勢而躋遐齡白首一節  
人生所難云衍子詵大理評事訢太常博士訥府  
作監主簿詒秘書省正字世長弟慶長太尉卿子  
從善等七人孫仲達等五人皆顯官各世其家衍  
善爲詩正書行草皆有法卒年八十贈司徒兼侍  
中謚正獻葬于宋城天巡鄉之仁孝原

趙槩字叔平虞城人初名誣嘗夢神人金書名簿有  
趙槩遂更之少篤學自立器識宏遠爲名輩稱許

第進士爲集賢校理開封推官奏事殿中仁宗面

賜銀緋出知洪州州城西南薄江槩作石堤二百

丈以障其衝水不爲患厯知青州滁州民愛之如

父母召知起居注代歐陽修知制誥求知蘓州擢

爲翰林學士聘契丹契丹甚禮重之還兼侍讀學

士諫官宋申錫論事忤旨帝欲加罪槩曰陛下始

而論申錫毋面從今黜之何以示天下乃止擢樞

密使參知政事數以老求去以太子少師致仕退

居睢陽士五年卒年八十六贈太子太師謚曰康

靖遠集世本諫諍事為諫林百二十卷上之神宗  
賜詔褒獎蔡秉心和平與人無怨怒雖在事如不  
言然陰以利物者為不少議者比之劉寬婁師德  
云墓在宋城天巡鄉蘇軾有神道碑銘

范仲淹字希文蘇州人二歲而孤母更適長山朱氏  
從其姓名說既長知其家世迺感泣辭母去之應  
天府依戚同文學第進士除廣德軍司理參軍迎  
其母歸養改集慶軍節度推官始還姓更其名母  
喪去官晏殊知應天府聞仲淹名請掌府學上書

請擇郡守舉縣令斥游惰去冗僭慎選舉撫將帥  
凡萬餘言服除以殊薦為秘閣校理仲淹汎通六  
經尤長于易學者多從質問為執經講解亡所倦  
嘗推其俸以食四方遊士諸子至易衣而出仲淹  
晏如也每感激論天下事奮不顧身一時士大夫  
矯厲尚風節自仲淹倡之累官資政殿學士戶部  
侍郎叅知政事卒謚文正仲淹少有大節其於富  
貴貧賤毀譽歡戚不以動其心蕭慨然有志於天  
下常曰士當先天下之憂而憂後天下之樂而樂

世誦以爲名言四子純佑純仁純禮純粹皆爲顯官名臣

本朝

李廷立字華海一字蓉懷自言蒲州人或云出故明代籓之裔曾以宗生貢於廷遭亂匿山中慮爲時所迫因載其母來客商丘買田一區於城西築舍栽花日夕吟哦其中性嚴重樸誠人不忍欺詩文不規規前人而妙發性靈自成一家晚盲于目自號西河矇叟日取書令幼子駛讀而聽之所作詩

文亦口授于駛使書焉至老不倦疾革自爲題旌之詞曰黃農虞夏之代東西南北之鄉亦士亦農之業呼牛呼馬之人可以想見其概矣旣卒友人田蘭芳輩謚之曰靖愨先生

陳維崧字其年宜興人大父于廷前明左都御史以東林正人與商丘侯太常父子同被削逐而其季子貞慧又與侯方域交善同罹阮大鍼之禍語載侯氏諸傳維崧卽貞慧之長子也自少詩文妙麗吳祭酒偉業目爲江東一鳳爲文長于排耦綜博

繡縟之中而具雄邁之氣掩盧駱而敵徐庾長洲  
汪琬稱爲七百年一人詩體初入雲間之室晚而  
之乎眉山劍南又好爲長短句激昂哀艷靚峭豪  
肆兼而有之更街談巷詈猥物瑣事入其筆端皆  
成雋語平生所作極富至一千七百餘首亦近代  
詞人所未有也陳氏旣與侯氏交深方域避亂陽  
羨曾以女許字維崧幼弟宗石鼎革之後維崧父  
歿家破宗石贅居宋遂爲宋人維崧爲諸生亦偃  
蹇不遇康熙六七年間有故人爲中州學使延之

閱文已年四十無子于宋買一妾傍其弟以居生  
子獅兒時方域已卒與侯方岳方巖及田蘭芳徐  
作肅之輩相倡和寓宋者五閱歲後以博學宏詞  
徵除翰林檢討纂修明史卒于官時宗石亦官畿  
輔爲經紀以歸葬初維崧自宋歸婦儲不悅其妾  
遣去獅兒亦死維崧遂不復置妾終無子徐尙書  
乾學議其從子履端爲後宗石梓其全集以行世  
今其里人舉之以祀鄉賢

田蘭芳字梁紫睢州人有名諸生間屢試弗售退而

益邃于學博聞多識春容長者極爲湯尙書斌所重寓館于郡城者二十年門弟子得其指授亦皆有名與商丘劉榛鄭廉號宋郡三茂才有逸德軒詩文集數十卷行于世

戴明信字孚尹本休甯人幼孤母吳氏年二十有六勵志守節鄉黨稱之明信少學書不成學爲賈遊中州至宋樂其地而居焉凡賈多鮮膏而明信獨任俠好施友朋以急難告者輒傾囊予之無吝色性孝友事其兄如父教育諸從子不啻已出其家五世未葬明信一人爲營窀穸不以累五世諸子孫人多高其義

方技

小道可觀君子不泥累朝正史不廢此一條但商邑無可傳者僅于宋得一人與非其類而漫引之不如少之爲愈也

宋

王懷隱宋城人初爲道士居汴之建隆觀善醫診太平興國初詔歸俗命爲尙藥奉御三遷至翰林醫

官使初太宗在潛邸留意醫術藏名方千餘首皆常有驗者至是詔翰林醫官各獻家藏經驗方又萬餘首命隱與副使王祐等編成百卷名曰太平聖惠方御制序冠之

仙釋

自二氏之教興而學其學者未嘗無魁人傑士宋產無仙釋而寇先墨翟之跡近乎仙矣若莊生者學本老氏故道家奉爲宗祖而寓言詭說譯佛乘者多竊之以文其須彌芥子之幻是無仙釋之名

而有仙釋之實者也若明季之僧青山其死更異彼家所謂應化羅漢者非耶天地之大無所不有小儒有目如豆而概以異端斥之過矣

周

寇先宋人以釣魚爲業居睢水旁百餘年得魚或放或鬻或自食之冠帶不去體好蒔荔枝日取葩實食焉宋景公召見之問其道不告怒而殺之後數十年踞于宋城門鼓琴十餘日而去

墨翟宋人爲宋大夫外治經典內修道術著書十篇

號曰墨子公輸子嘗爲楚造雲梯欲以攻宋崔之  
楚說而罷之年八十二入周狄山學道夜有神人  
授以秘書遂隱居以避戰國之亂至漢武帝時遣  
使者楊偉來聘不出視其顏色常若五十許人周  
遊五嶽不知所終

莊周蒙人嘗爲蒙漆園吏與梁惠王齊宣王同時其  
學無所不闕然其要本歸于老子之言故其著書  
十餘萬言大抵率寓言也然善屬書摛辭指事類  
情用剽剝儒墨雖當世宿學不能自解免也其言

洗洋自恣以適己故自王公大人不能器之楚威  
王聞莊周賢使使厚幣迎之許以爲相莊周笑謂  
楚使者曰千金重利卿相尊位也子獨不見郊祭  
之犧牛乎養食之數歲衣以文繡以入太廟當是  
時雖欲爲孤豚豈可得乎子亟去無污我我甯游  
戲污瀆之中自快無爲有國者所羈終身不仕以  
快吾志焉

明

僧青山自言蜀人雲遊四方崇禎中至商丘之閭家

集寓伏魔廟中見人恭謹無所異居數年一日忽語人曰我十日後當西歸遂不食至期端坐而逝口鼻中吐火自焚光燄繞身上下須臾自頂至踵其色如金扣之聲鏗鏗然胸前結一蓮花形時已卯五月十一日午時也緇白頂禮者甚衆尋流寇犯歸德土人慮賊疑其真金也因瘞之廟側其所瘞處亦屢現神異

商丘縣志卷十一

列女

范蔚宗謂列女當搜才行高秀者不必專在一操然婦言不出閨門才行豈易顯于世乎後世之談閨德者大抵節烈爲多是集約分五類曰高行曰烈女曰烈婦曰貞女曰節孝如是而已或事跡不盡傳而姓名在故冊者亦不忍湮之

高行

周



鮑女宗宋人鮑蘇妻也養姑甚謹蘇仕衛三年而娶外妻甚寵厚女宗妯謂曰可以去矣女宗曰婦人以專一爲貞以善從爲順豈有專夫室之愛爲賢哉吾妯不教吾以居室之禮而反欲使爲見棄之行將安所用不聽事姑愈謹宋公表其閭曰女宗樂羊子妻梁國穀丘人樂羊子嘗行路得遺金還以與妻妻曰志士不飲盜泉之水廉者不受嗟來之食奈何拾遺以污行乎樂羊子乃捐金游學一年來歸妻因趨機斷織曰夫子當積學以就懿德若中道而歸何異於是樂羊子復終業七年不反妻紡績以養姑兼饋樂羊子後盜欲犯之乃引刀自刎國人以禮葬之號曰貞義

漢

寡高行梁之寡婦色婉而性淑夫早逝梁貴人多欲娶之者不能得梁王聞之遣使聘焉高行曰妾夫不幸早死妾爲養其幼孤貴人多求妾者幸免今又辱王命妾聞婦人之義一醮不改以全貞信之節乃援鏡持刀以割其鼻曰王之求妾以其色也

今妾刑鼻何以事王使還報王重其義復其身號  
之曰高行

隋

木蘭姓魏氏本處子也世傳可汗募兵木蘭之父耄  
羸弟妹皆稚駭慨然代行服甲冑韃橐操戈躍馬  
而往歷年一紀閱十有八戰人莫識之後凱還天  
子嘉其功除尙書不受懇奏省視及還家釋其戎  
服衣其舊裳同行者駭之遂以事聞于朝召復赴  
闕欲納諸宮中木蘭曰臣無媿君之禮以死誓拒  
之迫之不從遂自盡帝驚憫追贈將軍謚孝烈今  
商丘營郭鎮有廟存蓋其故家云

本朝

宋夫人劉氏太保大學士權配也以賢孝聞權壯而  
無子勸娶李趙郝三妾侍之如姊妹明天啟末權  
宰陽曲時魏忠賢專政地方多建生祠權不可更  
欲抗疏陳其罪夫人曰此人臣之義當爾然太夫  
人年老恐以此賈禍重傷慈親心曷不以病辭歸  
養權乃止流寇陷京師權撫順天擒賊將黃錠等

誓死報國讐氏奉太夫人遁山中及王師入關  
命權巡撫順天如故氏謂權曰國讐已報公可長  
往矣權累疏辭不許及召拜大學士氏復申前請  
六年而始得致政之命欣然歸里不啻如鹿門之  
隱權既卒訓諸子以勤學謙謹故中州世族家法  
推宋氏爲第一大學士

烈女

明

金玉蘭家世衛指揮年十六未嫁正德辛未賊破城

玉蘭被執不從且罵且拉遂裂其尸于東郭五里

周之外詔旌曰烈女

趙氏女許字曹可仁未婚可仁病死趙未笄在室聞  
喪痛哭三日不食自縊而死

曹氏故光祿署丞曹雲龍女未字值寇至前一日閤  
本家戒嚴治裝女泣謂母曰賊信已迫猶爲輜重顧  
戀獨不愛身命乎兒不愛一死慮二老顛沛幼弟  
難提抱耳次日逃避忽遇寇女遂投井賊欲使出  
女罵不絕口被賊墜石擊死

鄭氏邑民鄭其顯女年甫十四未字壬午寇攻歸德  
父母率領欲避女曰吾本女流賊既至惟死可也  
將欲何往父母強之不從托言如廁投水而死  
本朝

徐氏邑民徐明智女許字同里赫連勲年十七未嫁  
而勲死女聞飲泣入室易新衣即日縊死知縣周  
宗義高其節令與勲合穴里人乃相望而葬

周蘊香太平營叅將周祺女本遼東人其父寓居歸  
郡幼慧穎知書父嘗呼爲女學士九歲隨父官甯

夏都司金某爲其子聘焉已而金遷粵東三藩叛  
路梗丁已金以書來云爲其子別娶請祺改擇壻  
蘊香聞之哽咽曰父母有成命尙何言一死以明  
吾志可也父母驚且慰之展轉自悲傷遂不食偃  
臥于床不能起一日忽坐床上索鮮衣勉強櫛沐  
臨鏡視粧從容起拜父母曰兒不孝負鞠育恩過  
午卽長辭矣家人皆未信至時低首不語人視之  
死矣

李三姐鄉民李茂春女康熙己卯有強暴李大成者

窺其父母往田間入室逼淫之三姐不從遂爲其所殺官訊得情誅大成而爲三姐建坊于墓前

周氏女水池舖人許字董璉夫故自盡縣立碑表之秦六姐西關民秦標女矢志潔清不嫁偷見自經于母柩前合郡士民公祭之睢州田蘭芳紀其事

烈婦

周 伯姬宋共公夫人魯宣公之女十年共公卒伯姬寡居偶夜失火左右曰夫人盍少避乎伯姬曰夫人

之義保傅不具夜不下堂頃之左右又曰夫人盍少避乎伯姬曰越義而生不如守義而死遂逮乎火而死

明

曹氏諸生張琮妻琮卒曹因給匠氏曰夫嘗囑我作棺必寬大乃可匠如其言大之是夜自縊同棺而葬景泰末詔旌其門

張氏孟綸妻也綸進士瑛之季子就學成疾而卒張命工作寬棺從容拜姑嫜自盡同棺葬焉有司以

聞表其門曰貞烈

范氏諸生王輔妻事姑曲盡婦道輔臥病嘗謂范曰  
吾先世皆不壽吾之命未可知如有不諱老母累  
汝矣范泣曰是言誠不忍聞叔轍幸成立志在與  
汝同棺也及輔疾革范不舉哀發喪從容整飾更  
着新衣拜姑曰不孝婦不終養矣拜轍曰善事老  
母我從汝兄死矣拜親屬曰念夫故憐我老母乃  
撫輔柩曰老母托叔吾二人事畢矣遂自縊於柩  
側同棺葬焉提學副使楊維聰扁其門曰貞節

袁氏諸生宋鑣妻歸德衛千戶昇之女鑣卒袁仰天  
慟哭引刀自裁而死

王氏沈堪妻堪瀚之曾孫也王合登堪以力學病矣  
王侍藥有偕死志越明年堪果卒王年方二十不  
易衰服從容自縊以殉萬厯初有司奏表其閭

司氏太學生劉朴妻嘉靖癸丑柘賊師尙詔入朴宅  
中擁司令上馬司不從罵賊仆地賊殺之

陳氏諸生曹鏤妻也鏤無嗣陳乃爲卜得妾李氏甚  
相驩鏤病劇陳命工復作二棺而李遂先自縊死

及鏤瞑目陳斂鏤完從容亦自縊死

李氏陳氏陰陽官馬思齊一妻一妾也思齊病死李

氏同陳夜縊柩前事聞表曰雙烈

徐氏永達族孫女也適諸生安世麟世麟早卒徐年

十八大慟自縊麟傍詔表其閭

常氏王尙仁妻尙仁卒乏嗣常年二十九痛哭不食

自縊以殉

王氏郭芬妻翟氏王氏其妾也芬病死視殮完同夜

俱自盡

傅氏諸生劉澤新妻因姑病誓單三冬中寒身故次

子劉鈐哀毀過慟泣血死鈐婦夏氏慟夫死孝當

夜焚粧自縊孝烈出於一門曾經題卹建坊修墓

令有司致祭

高氏張維禮妻年二十七歲夫逝氏號泣數絕終自

經干柩傍邑令旌其門曰節烈

程氏李箱妻箱死約伯叔兄弟李節等將家資平分

從容縊干柩側

周夫人曹氏周尙書士樸妻也壬午城陷士樸殉難

曹氏謂妾張氏曰吾受綸誥爲夫人應死汝子幼可少待也張氏曰夫人以義死余獨可以苟生乎遂墜井俱死子業熙妻沈氏亦殉節

侯太夫人田氏太常寺卿侯執蒲妻壬午寇變入城氏年近八旬是日居室不避見賊卽罵觸賊怒被難又子忭婦劉氏恕婦朱氏守姑不去同被難

趙氏永城趙佳璧之女也幼事親孝及適庠生王聖明事舅姑益以孝著家食貧執婦功績紡每達曙崇禎乙亥寇至濟陽鎮聖明與其父徵庸不屈而

死趙守屍慟哭不懼賊服其義不殺夜縊屍傍縣令喻大爲旌題其塚

余氏貢生王道弘妻壬午寇陷歸德氏誓不與賊面持刀與姑慟哭自刎而死

張氏李目妻居城東北三報祠前爲寇所執罵賊不屈而死日于本朝登進士官翰林侍講氏贈孺人

王氏工部郎中沈試生母城陷居室不避罵賊而死侯氏太常執蒲叔琳女也適諸生劉浩生一女嫁太



常子沐浩卒之明年流寇陷城爲賊所執驅以使  
磨賊怒捽之出適怵亦爲賊俘至氏目之怵恐俱  
死不敢言賊指怵問氏曰何人氏曰不識也何問  
爲賊愈怒縛之庭樹立射殺之

孫氏沈仔母也自十九守節至五十七歲已奉旌表  
壬午寇變從容自經孫氏次子佑勸其母死遂自  
經佑妻任氏佑子妻王氏亦俱自盡

張氏張循奇妻聞賊進堤携小姑逃至水畔賊至不  
屈賊持刀砍之張呼其姑曰與汝止此一面遂溺  
死

侯氏諸生楊家訓妻自十八歲守節五十年至六十  
有八壬午寇變殉難

王氏諸生張乃浩妻壬午寇變罵賊不屈投井自溺  
死

許氏戶部侍郎許世蓋女指揮賈之瑄妻城潰許誓  
不與賊面抱二女投井而死

譚氏貢生鄧杖策妻壬午寇變被執欲爲使令不屈

而死

楊氏貢生曹軫明妻壬午城陷楊持身端嚴自焚而死

賈氏尹繼美妻夫死守節二十年壬午寇變閉戶自經

王氏諸生李用先妻壬午城潰王扶姑逃至東城濠邊被執不屈而死

劉氏奉祀生沈垓妻二十八歲稱未亡人茹苦四十年餘年壬午寇變劉慷慨赴義從容就經十日賊去

肌膚如生鄰里收瘞

宋氏陳盛典妻素嫻女訓孝事公姑寇變被執宋厲聲大罵賊怒以刀刺入右脇而死

劉氏齊氏皆中書舍人沈誠妾因賊舉火焚姑張太安人極罵賊死於柩傍

李氏諸生沈諾妻與夫皆罵賊而死被賊刀分其首侯氏諸生常樾妻壬午之變遇寇義不受辱而死

鄭氏鄧文光妻奉姑以孝聞壬午寇變執鄭平城怒罵被難

李氏沈諱妻幼有孝行秉性貞靜壬午寇變被執不從墮城而死

周氏常世煜母城潰被執不屈罵賊而死

閻氏諸生朱佐妻城潰被執不屈投井而死

楊氏諸生李翥妻壬午城陷不屈罵賊而死

李氏諸生李杰妻壬午城陷被難

蕭氏陳希閔妻與姪婦陳王教妻牛氏因見賊入時

齊聲憤言同時遇害

張氏諸生燕景召妻壬午城陷不屈賊奪其所抱兒

以迫之張不為動賊殺其兒張罵賊併殺之

李氏諸生徐繩武妻武早卒撫其孤培又生遺腹子

垣培更早天王午城陷李與垣並殉難焉

鄧氏耆老謝堯中妻壬午聞城破自縊於家

張氏殷從仁妻壬午城破賊索其裙蔽雨罵而拒之

遂遇害

楊氏奉祀生田作浹妻壬午城陷同妾王氏負姑匿

破屋中並縊梁上羣賊往來窺見三屍輒去不搜

姑獲以生後邑令冀往聖旌其門

李氏王重祿妻年十六擄壬午闖賊之難罵賊而死  
後重祿于 本朝順治庚子科中武進士仕至參  
將

紀氏儒官李文晟妻壬午城陷危坐中堂罵賊而死  
賊碎其屍

湯氏喬友諒之妻舉人喬榛之母壬午闖賊圍城人  
皆避地河北或勸之去氏曰死生定數果應死河  
北豈能獨生耶况我兒登陴捍賊我義不忍捨之  
去卒不往及城破賊入室氏厲聲叱之賊以刀劈

其頰猶罵不絕口斷其右臂而死

沈氏順河集李逢春妻崇禎十五年為袁時中賊所  
執盡以金珠雜佩與之度不得免遂厲聲罵賊賊  
怒連斫數刀舉其屍焚之

呂氏李尚忠妻壬午之難遇賊于城西北隅田家園  
罵賊而死

謝氏李貴興繼妻壬午城破遇賊于城隍廟後被執  
不屈而死

袁氏諸生王機妻壬午城破即自縊死

商邱縣志 卷之十一 三  
游氏明諸生馬振芳妻女嫁諸生田矜壬午城陷氏偕女俱不污於賊被害

本朝

賈氏李家口民徐士泰妻康熙丙子士泰死賈氏欲殉之親屬防守甚密三日笑語如常防者稍懈忽登夫柩自縊知縣周宗義立碑表之

張氏李鯤妻鯤病歿張氏自盡郡縣旌其閭

沈氏馬又思妻歸于馬夫已病奉藥餌操井日不怨不懈未及一歲而夫亡翁馬俊星謀食于四方有

幼子僅七歲氏携之依其母家備嘗荼苦一日俊

星忽于戶即寄書令氏改適蓋憐其年少無依也

氏且發函夕即自盡有司旌其閭併題其墓

劉氏西關民宋建妻夫亡三日即自縊于柩前郡守

武弘祖給匾旌之

張氏西關民林振福妻夫患蠱疾苦不能忍自縊死

氏亦乘間自縊于屍傍年二十六

張氏民劉之仁妻年十八結褵半載夫即病氏奉湯

藥年餘每禱天願以身代仁病將革氏知不起潛

入別室自縊越二日而之仁亦死

王氏水池舖民王友之次女嫁於丁順順好賭博費其父之貲父將懲之順懼自縊氏哭之慟氏雖小家女而容止楚楚夫既死翁姑向傭於主其主官溫縣教職子死翁仍之溫而以氏歸于父母家未幾亦自縊死蓋素有殉夫之志卒自遂焉邑人劉榛傳其事

馬氏葉楚望妻楚望死遂自縊以殉

郭氏葛友松妻夫死自縊以殉

朱氏吳倫妻夫亡自縊

貞女

明

解氏姑名妙成穀熟人自幼婉善未字遭父母繼亡乃與弟讓智榮三人相依後讓智亦皆早卒姑以榮與讓智之子俱稚乃爲之理家事衣食婚娶悉取給于姑又命讀書學禮各底成立姑志在撫孤遂不欲適人年八十有九竟以處子終于家從子宗達感其義爲之廬墓一年後經題卹建祠載在

祀典

本朝

曹氏貢生曹軫明女許字王長年以失母無依年僅十四遂歸王家其時長年已病瘡不能合香與其姑鄧氏同臥起未幾長年殤矢志不嫁守節四十餘年有司以聞令建坊旌獎

近有張氏昭姐乃西甯總兵張岳女許字何都統子未成婚而何子殉昭姐奔喪守節不願更醮但尙在芳年未敢立傳附存之以俟異日論定云

節婦 孝行亦  
附入

周

蔡人妻宋之女既嫁於蔡而夫有惡疾其母將改嫁之女曰夫之不幸迺妾之不幸也奈何去之婦人之道一與之醮終身不改彼無大故又不遣妾何以得去終不聽君子曰宋女之意甚貞而一也

宋

蔡妻張氏睢陽人既嫁而夫屬死畧盡骨俱無歸張乃不御膏沐鬻囊中裝饑寒苦積十年餘一舉而

十八喪得所依手自植松楸身沾塗泥見者皆泣  
卒辦其家事云

元

張氏苗子榮妻元末夫亡年十八遺腹生子張事姑  
撫幼歷兵變中以節自勵人無間言洪武中詔旌  
其門

明

宋氏趙琳妻陝西咸甯人父輩知歸德州琳隨德衛  
千戶也故宋歸之宣德間琳客兩河口暴得狂疾  
乘馬夜亡宋訪之不得乃以其衣冠葬焉時宋年  
十九事姑甚謹姑嘗病疽百藥罔效宋吮之遂愈  
年六十七卒有司上其事詔旌曰節孝

高氏諸生周仕邁妻仕邁卒高年二十八撫孤鎧亦  
爲郡學生事葬舅姑靡不盡禮年逾七旬卒郡守  
任儀爲之傳

宋氏生員鄧一儒妻也儒死遺孤二歲餘宋年二十  
七卽引刀自刺死復甦家無立錐撫孤事姑倍歷  
艱苦十有三載而卒



沈氏閭惟德妻鴻臚沈鱗女也氏十四歲適惟德未  
廟見而翁故又八年而夫亡遺一男甫三歲又遺  
腹女一祇姑張氏在婦佐其姑理家政尙勤儉晨  
昏啟閉甚嚴非至親罕覩其面亦絕不以其貴驕  
人張庶姑也性峻厲時出諄語沈笑而受之卽歸  
甯亦不以白父母張疾婦躬事藥餌殷勤備至姑  
歿執喪哀毀踰禮有司題請旌表

宋太夫人張氏贈大學士福山縣令宋沾妻四十無  
子勸夫娶側室沾娶妾丁氏至喜遂以家政委焉

姑田氏病張侍藥餌晝夜不解衣者數月姑歿亦  
以哀毀致瘁卒天啟間巡按御史丘兆麟以孝聞  
詔同妾丁氏及沾弟婦劉氏並建節孝坊

劉氏諸生宋渥妻渥卽沾弟也年二十九卒無子氏  
欲以死殉不食姑田氏持之曰吾與爾翁俱耄賴  
爾輩養之爾夫雖死有爾在爾爲夫死獨不爲翁  
姑生乎劉乃食姪權生劉曰姪爲猶子是吾有子  
也撫教倍至脫釵釧衣服鬻質以半供其舅甘旨  
以半助權延師脩脯同權母甘貧茹困矢志撫孤

天啟間與張氏丁氏並旌

馬氏張應儒妻年十九夫亡子國維生甫九月翁姑又相繼亡姑遺五月幼子三歲幼女馬葬翁姑盡禮將姑所遺子女身爲乳育撫養成人織紉教子年六十餘而卒有司題請建坊

楊氏徐宗偉妻年十八適偉二年而偉逝守節三十五年而卒

胡氏太學生藍夢徵妻夢徵早卒氏守節不嫁撫孤養親人稱有孟母之操而兼栢舟之節者也

李氏陳守業妻二十九歲稱未亡人守節至九十六

歲督學使者旌其門

朱氏贈知州常三會之妾年十九夫故苦節堅貞教子成名上官旌其閭

徐氏山西叅政喬巖妾巖卒于任遺孤二徐哀毀數日不食欲以死殉其嫡萬宜人慰之曰二子尙幼與其死節以悞二子不如教子以成名徐乃少食後子國材舉孝廉國斌餼于庠皆徐之教也年七十有三直指旌其門

尹氏官生沈埭妻志勵栢舟節凜冰雪玄髯白髮始  
終一操有司建坊旌獎

潘氏儒士高儉妻儉蚤故潘年十九稱未亡人苦節  
堅貞撫孤高君弼爲郡諸生孫高瞻登崇禎己卯  
賢書

袁氏張淳謙妻貢士袁道女年二十夫亡哀毀欲殉  
因遺腹未果後生子存宗克終初志

張氏陳近峰妻矢志守節食貧孤苦子應選亦以孝  
聞郡邑俱爲之獎勵

本朝

丁氏宋沾妾沾福山令卒于官子權甫八齡姑田氏  
元室張氏尋相繼亡時舅太公年已九十家徒壁  
立丁出其簪珥朝夕甘旨無闕家有五喪未葬丁  
襄之無廢禮丁與妯劉氏善劉無嗣絡繹蕭蕭終  
夜相間晝則延塾訓其子夜則自督之子或倦寢  
丁泣曰余冀孤之立也故隱忍以俟今不學不如  
早從爾父於地下也子感泣力於學稍長出遊歸  
必詢其所與遊者善則喜不善則竟日不怡繇是

子之學大成以科第顯及登諫垣丁始有喜色曰  
 吾所以不即從先君地下者以望汝之立也今幸  
 有成吾願畢矣尋封太孺人旌節建坊入 本朝  
 以子貴加封太夫人賜祭葬

萬氏孫訪妻無子女苦節四十餘年且養老待幼以  
 孝慈聞

戴氏郡學生孫炳妻苦志守節栢舟自矢事姑撫幼  
 孝而能慈

賈氏諸生喬坦妻舊志稱其撫孤二世飲冰一生具  
 亦貞節之表表者

余氏閩家集民張文智妻年十八歸文智越四歲而  
 寡生子世卿甫二期會寇亂氏提孤兒奔竄戎馬  
 間屢瀕于死久之乃定以嚴儉治家子孫俱有成  
 立年八十四卒

李氏故民姚自登妻自登無子勸夫娶妾陳氏生子  
 文起踰年而夫死李氏陳氏並年少守節教子成  
 家知縣周宗義旌其門

陳氏諸生鄧悟妻青年守志歷三十餘年

喬氏諸生侯暉妻甯陵喬方伯進璠之女有賢行年二十八而暉死子方建方覲俱在嬰孺後皆教以成名稱未亡人者二十有七年

楊氏喬世祥之妻壬午城破氏年二十九世祥遇害無子矢志苦守有姑在堂孝養四十年族人貧乏氏有田五百畝留養膳田三十畝餘悉以分之族眾鄉里高其義年七十五而卒

曹氏勒馬集民陳九紹妻年二十四而寡子純方三歲純長娶婦宋氏生子而純死宋氏與姑苦守一

門雙節曹年七十三而終宋年七十四而終

侯氏明陝西監軍道曹心明子鍾妻也十七而歸鍾又三年而鍾死于亂無子養鍾兄子爲嗣守節六十餘年

趙氏諸生喬沛妻于歸六載沛死氏守志撫孤歷五十餘年

張氏諸生朱曉妻夫亡苦節教子成名

劉氏諸生劉憲典之母矢志守節垂四十年

葛氏丁亥進士葛陞女太學生宋之堡妻年十七而

歸堡五年而堡卒無子養堡兄之塾子金爲嗣矢志苦守康熙二十年間回祿焚廬氏倉皇奔烈焰中撫夫棺痛哭俄而風熄火滅棺室獨無恙人以爲誠節所感有司建坊旌表

郝氏韓介垣妻年十七介垣亡無子繼嗣屢繼屢夭矢志不嫁後又繼一子苦節三十餘年而卒

趙氏諸生朱加縉妻年二十九加縉歿值闖賊破城氏從樓中下墮破頭折股死而復甦食貧守節教子成名年七十餘卒

張氏諸生喬焯妻年二十八守節壽踰八旬而終王氏諸生曹湯臣妻湯臣避亂卒于河北氏家貧無依撫孤守節子孫皆有成立

宋氏田作震妻作震壬午守城殉難氏棄子扶姑避亂河北姑尋以病歿負土成墳葬姑數日棄子得還食貧守節後五十餘年而卒

陳氏潘廷建妻廷建明侍郎潘禮之裔天亡氏苦志守節又潘士傑妻張氏年未三十潘卓妻劉氏年未二十俱夫亡守貞不嫁知縣劉德昌旌其閭曰

三節德門

魏氏鄧斌口民楊鳴蛟妻年二十九而寡矢志不嫁  
孝姑教子年六十餘卒

侯氏馬牧集民張國楨妻素孝于姑年二十三國楨  
卒氏撫子守節

呂氏明崇禎丙子武舉史懋明之妻懋明既守城殉  
國氏孤孀無依躬勤紡績苦節三十餘年前邑令  
朱衣貴旌其閭

楊氏馬牧集民張大烈妻年二十二大烈歿氏卽欲  
從死勺水不入口者三日其姑力勸之乃止撫孤  
守志備極貧苦垂四十餘年

楊氏宋應雷之繼妻應雷幼無子氏尙在盛年守志  
不嫁撫夫弟應電教之讀書成名苦節三十餘年  
唐氏楊天楨妻年二十八而天楨歿孝養舅姑教撫  
弱息今已三十餘年子世高讀書不就爲撫院椽  
曹

王氏侯斐妻年十九夫死不嫁食貧孝姑康熙十四  
年六月姑病曾割股以進姑病爲之愈前邑令朱

衣貴旌其節孝

盛氏劉克讓妻明崇禎末克讓死于寇亂氏年方二十一歲撫週歲孤兒守志不嫁倍嘗艱苦前令曾旌其門

王氏閭家集民江之芳妻明季之芳死于寇亂氏年甫二十二歲守其孤江瑞苦節五十四年至康熙丙子乃卒瑞邑諸生有妾孫氏生子淮年二十五瑞切矢志不嫁淮既長娶妻李氏生二子年二十八而淮死李氏亦苦守不醮人稱三世貞節

劉氏儒士郭珣妻二十九夫亡守志今已五十餘矣  
范氏太學生李偵妻少寡不嫁已守貞三十餘年

周氏燕大成妻年十九而大成病篤生兒止週餘剪髮自誓大成既塲氏欲從死者再翁姑力阻而止越一年兒發痘已死氏遂自經舉家百方救乃甦又視死兒蠕蠕動稍復有氣從此遂愈既而兒復患疹又將死氏晝夜泣忽夢神人曰汝本無子上帝憐汝節孝特賜此兒及醒兒漸起遂不死及長名曰砥氏事翁姑極孝教子嚴砥雖未成名而有



學行里人鄭廉傳其事

王氏諸生孫之偉妻年十九夫亡守貞五十餘年至八旬乃終

邢氏貢生沈洽之繼妻洽之明宰相鯉之裔明末避亂江南家室流離資志以歿時氏年二十六食貧教子守節五十餘年前令周宗義旌其閭

常氏東平知州常維翰之女邑諸生沈譽妻譽亦明宰相鯉之裔有文而歿氏甫十九無子遇亂流離倍嘗艱苦守節六十九年得壽八十八歲已題請

建坊于平臺之里

潘氏諸生趙方昇之妻二十九歲而方昇歿撫孤養親壽至九十一而終子雲秀以明經仕至陳州學正以學行見稱于世

李氏孝廉李瀚女尙書侯恂長子方來妻少有文名早卒氏年二十二遺孤駿方二週矢志守節駿長又死于寇難乃以夫弟方夏次子昀爲嗣氏年八十二終有司建坊旌獎

沈氏儒士涂麟妻年二十三明末城破夫亡守節六

十餘年前令胡揚俊曾旌其閭

趙氏諸生常宜妻年十九而寡遺孤甫週月食貧守志垂四十餘年

徐氏明解元徐作霖之女適太學生葉元洽素有賢行克盡婦道元洽早亡無子勵志貞堅長齋繡佛二十餘年如一日雖年不及例未膺旌典而稱女宗高行者內外無間焉

葉氏明諸生鄭衍衿妻年二十四夫亡守志壽至八十餘歷蒙當事旌獎

范氏劉允璽妻允璽早亡甘貧守節歷四十餘年

馬氏諸生張鶴妻年二十六歲夫亡無子孝養舅姑卹嗣子苦節三十餘年

侯氏諸生楊式訓妻明戶部主事楊名時子婦也夫亡無子勵志守節

何氏鄧斌口馬吉士子婦年二十四夫亡守志割股孝姑歷節四十三年

張氏名士張翮之女適邢其豹甫十九而寡守節六十餘年已八十五歲前令趙申喬曾旌其門

郭氏太學生葉增煥之妻增煥有文而妖遺孤漢封  
甫五齡氏勵志守節孝姑教子今踰三十年里人  
舉請題旌

王氏楊士全妻夫亡寇亂生遺腹子名崑盛年守節  
歷三十九年而卒

馬氏朱正茂妻明末正茂死于寇氏欲持刀自刎其  
姑力阻苦志守節垂六十年至九十乃卒

曹氏明貢生曹奎明之女憲副曹代蕭女孫也幼適  
諸生劉廷玠年甫十九而廷玠歿撫孤守節里黨

稱賢

高氏宗祿村民郭廣妻姑病勢篤醫藥罔療高氏對  
天禱祝封股肉進食姑病立愈

田氏侯肩殖妻進士侯明子婦也于歸四載夫亡守  
節旣而子死姑死翁死祖姑又死將葬其夫觸棺  
濺血未幾亦死年止二十九

周氏明諸生宋代隆妻崇禎壬午代隆守城殉義氏  
偕妾李氏並守節各七十歲而終

韓氏張朝祿妻夫亡年僅二十遺腹生一子甘貧守

節垂五十餘年

楊氏馬允錦之妻夫死于寇亂苦志守節垂四十餘年

田氏明諸生張垣妻夫亡守節時年二十八歲子乃彝守德乃知俱以孝行聞見別傳

周氏勒馬集民李發光妻夫亡年十八歲矢志守貞前令周宗義旌其閭

傅氏諸生李維條妻歷節四十餘年又有崔氏故民李育德妻歷節三十八年俱經知縣劉德昌給匾

旌門

李氏明諸生閆毓和妻孫氏儒士閆貴和妻壬午寇亂毓和貴和俱被害二氏苦節守貞垂數十年

宋氏大學士權長女年十五歸於侯慮慮故太常執蒲幼子佻蕩不檢氏婉順奉之久而感且相得甚歡踰年郡城破慮死於賊氏隨父家渡河得免慮旣死人莫敢以告氏日夕冀其歸祈所以歸者萬狀諸禱祀不驗則茹蔬食淡幾二十年卒以哀痛死然垂死終莫知夫之果存亡也嗚呼可傷已

商邱縣志 卷之十一 三  
楊氏馬牧集民張乃清姪婦年二十夫亡守節垂三十餘年

王氏故民王琚妻年二十一夫亡無子甘貧守節親黨有勸之醮者以死自誓康熙二十五間有母舅趙姓者陰以氏許嫁張生員氏聞卽飲毒卒前令趙申喬杖其舅數十而令禮葬焉

許氏諸生劉仲彥妻自二十五歲而孀居苦節四十二年而卒子德均娶賈氏德均死亡氏年方二十有一亦勵志守節垂三十餘年

田氏故民楊炳之妻年二十三夫亡守節子光祖以明末破城殉難氏孤苦撫孫又十餘年而卒

張氏少嫁張印聖年十九而印聖歿遺腹生子兆吉勵志守節教其讀書成名而氏母弟張顯亦幼孤無依氏撫育之甥舅互相師友顯亦補博士弟子人稱其節孝兩全郡縣俱旌其閭

陳氏明諸生宋湛妻亦福山令沾之弟婦也湛歿氏年二十有八撫孤守節歷四十三年而終勤儉持家教子成立人稱賢母有司屢給匾旌之

張氏明儒士李貴通妻年二十七夫亡守志垂五十餘年而卒邑令曾旌其門

張氏諸生張國維妻張氏庠生張珣妻壬午寇亂二氏俱殉難而死

商邱縣志卷十二

藝文

文章之可志者三一曰有關於邑之事一曰有關於邑之人一曰有關於邑之地舍是弗庸濫矣而尤以雅馴為歸其類不一而約分五集曰王言曰其禠文曰賦曰古體詩曰近體詩至前賢著述雖湮沒者已什之九而其名尚存亦未可略也故以書目終焉

王言

王言

周

成王微子之命

王若曰猷般王元子惟稽古崇德象賢統承先王修其禮物作賓于王家與國咸休永世無窮嗚呼乃祖成湯克齊聖廣淵皇天眷佑誕受厥命撫民以寬除其邪虐功加于時德垂後裔爾惟踐修厥猷舊有令聞恪慎克孝肅恭神人予嘉乃德曰篤不忘上帝時歆下民祗協庸建爾于上公尹茲東夏欽哉往敷訓慎乃服命率由典常以藩王室弘乃烈祖律乃

民永綏厥位毗于一人世世享德萬邦作式俾我有周無斃嗚呼往哉惟休無替朕命

漢

和帝報梁王暢書

朕惟王至親之屬淳淑之美傳相不良不能防邪至令有司紛紛有言今王深思悔過端自克責朕惻然傷之王其安心靜意茂率休德易不云乎一謙而四益有小言終吉強食自愛

宋

真宗伊尹廟碑贊 有序

始就于桀以勸人臣之誼後歸于湯以濟天下之  
 難咸有一德敷祐萬方大節昭明嗣王服其訓餘  
 慶不墜令子承其家舊禮攸存明祀新享朕因駐  
 蹕永用懷賢聊復刻銘庶幾旌善贊曰  
 成湯之仁溥率來賓阿衡之忠天輔成功民難既平  
 嘉謨實真王室不衰大訓可知蘋蘩之祭傳子永世  
 金石之刻表予褒德

高宗祀大火商丘宣明王位樂章

炎惑在天惟火與合繫神主火純一不雜作配  
 祀功則然不腆之幣于以告虔其奠幣嘉安  
 誰其祀神知神嗜好式崇祀火為神所勞跪言  
 既與火俱於樂旨酒承神嘉虞 酌獻祐安  
 出火祀太辰宣明王位樂章 酒獻祐安  
 二七儲神與天地並孰儷厥德聿維南正功懋  
 陶唐 濞流億姓作配嚴禋贊列惟稱 奠幣嘉安  
 周設司燿雖列夏官仍襲孔易闡端實難相彼  
 商丘 永懷初造不腆桂椒匪以為報 酌獻祐安



納火祀大辰宣明王位樂章  
 恭惟火正自陶唐氏邑于商丘配食火祀有功在民  
 有德在位敢替典章惟恭奉幣 奠幣嘉安  
 廣大建祀式崇其配馨香在茲清酒既載穆穆有畢  
 洋洋如在聿懷嘉慶絜神之資章酌獻祐安  
 明

太宗詠睢陽三孝子

昔時有過屢遭笞此日臨笞却淚垂只為母衰難使  
 痛一心喜懼忽傷悲

伯俞泣杖易傷情童稚能知愛日誠至孝由來天所  
 風遂令青簡播芳名

右韓伯俞

事親色養且躬耕侍疾猶能盡至誠劬瘁七旬衣不  
 解鄉人咸仰翟先生  
 亡親廬墓自成墳忍凍哀號不可聞一犬悲號雙鵲  
 擾高風千古播清芬

右翟普林

備身事親為家貧母歿哀號夜及晨妻子嗷嗷從不

給平勤負士只成墳  
瓜生同實木連枝盜賊相知不忍欺蛇鶴俱馴來繞  
護由來純孝感天知

右侯義

又賜進士在旺勅

朕惟聖賢之學始終無間德業大成必資持久爾積  
學能文克膺舉薦省覽敷言良深嘉嘆茲特命爾  
歸故鄉以成德業副朕所期毋自滿而驕毋自怠  
縱博學審問慎思明辨篤行求至希聖希賢俟朕

命爾卽來朝欽哉

宣宗祭唐張巡許遠文

惟神咸稟至性效忠所事捐軀殉節金石其心炳炳  
光輝垂休永代君臣之義人道之綱風化所關表勵  
宜厚爰命有司祗修常禮英靈斯在尙其享之

英宗諭山西按察使徐永達勅

朕惟朝廷設風憲之官以司紀綱以任耳目糾正伯  
僚廉察民隱用彌隆于政化况按察使監臨一方厥  
任尤重今慎選于衆特命爾爲山西按察使爾惟本

之以仁奉法循禮廉潔公恕將下之人孰不警飭爾  
惟明于燭隱慎于用刑如鑑如衡將下之人孰有冤  
枉必鋤遏強暴必扶衛善良凡境內文武諸司其博  
詢審察有賢德才能者具以實聞用憑獎擢有貪刻  
暴橫者具其顯迹禽解京來以除民患爾其懋哉朕  
夙夜孜孜以養民爲重其體朕之意圖維安輯務存  
大體無事苛細用副簡在爾其欽哉故諭

神宗諭祭贈太子太保謚莊敏吏部尙書宋纁

文

惟卿賦性直方稔躬清介筮官郡理庶獄稱平掄置  
憲臺百僚見憚迨遷京兆三輔之枹鼓希鳴再鎮郊  
圻重關之鎖鑰彌固尋迴環于計部力汰浮徭自特  
簡于天曹首懲操競九流式序洵冰鑑之無私四海  
攸均徵泰符之有象方隆倚任胡不愍遺爰追盡瘁  
之忠實表匪躬之節特頒優卹仍易嘉名靈爽如存  
歆承無斁

神宗存問少保兼太子太保禮部尙書文淵閣

大學士沈鯉文

朕惟用人求舊迺哲后之芳規憲老乞言實明時之  
盛典矧重望夙瞻巖石而高年舉頌岡陵宜錫綸旌  
用彰渥貺卿純忠天植素履霜嚴珥筆鑿坡卽游夏  
之詞莫贊橫經虎觀非堯舜之道不陳爰自講幃進  
登揆路清操如楊綰坐鎮有餘正色若王曾立朝不  
倚何意小羣之未渙致令大老之孤揆當風波震撼  
之中迨雨雪睨消之後勁節不同于百折高名勇退  
于一辭鳳翔千仞之巔疇不欽其儀采龍臥五雲之  
上世共仰其清娛已踰尙父之齡正斂箕裘之福睠

茲者碩載舉彝章特遣尙寶司司丞蔡毅中齋勅存  
問仍賜銀五十兩大紅紵絲蟒衣一襲彩段四表裏  
以示睠懷於戲臨雍拜老代修袒割之儀虛席延賢  
時下安車之詔五百年有名世勿負經綸八十者杖  
于朝尙須輔弼朕將咨千黃髮卿益端其丹衷欽哉  
又贈少保兼太子太保禮部尙書文淵閣大學  
士沈鯉謚文端文

朕瑩精化理注意贊襄惟二三輔弼之臣眷禮最渥  
間有難進易退未究厥施賫志云亡世所共惜者衰

卹爲獨隆焉爾原任少保兼太子太保禮部尙書文淵閣大學士沈鯉乾坤正氣伊洛真儒以澹泊甯靜之衷勵剛毅端方之節歷升華貫爵祿不入于心迨陟台垣經綸出自其手鹽梅素具足月和羹薑桂性殊難諧世味時方醜正履虎尾以危身自許樸忠批龍鱗而悟主誠可孚于巷遇志已決于林居孰十年白社之娛繫四海蒼生之望璽書存問貯待賜環遺表進規驚聞易簣人百身其莫贖悼失典型朕一老之不遺痛遺碩德是用贈爾爲太保謚文端錫之諡命於戲三公峻秩儼躋道路之崇階一字榮哀允合易名之大典歆茲紫綬賁乃黃墟

之表勳勞股肱方之倫屬千事責存旅不人千心給  
步台垣經綸出白其手權權其足月知義直  
不難道世來時方剛正履履以危身月知義直  
龍麟而悟止誠可余下春也志已共去本居  
日社之險緊四海蒼生之幸聖書有明仁存以  
長谷文大典精義崇報責以黃盧  
命外燭三公刻火燭香首領之崇問一字榮榮大

商丘縣志卷十三

藝文二

雜著

自漢至唐

漢

上梁王書

鄒陽

臣聞忠無不報信不見疑臣常以為然徒虛語耳昔  
者荆軻慕燕丹之義白虹貫日太子畏之衛先生為  
秦畫長平之策太白食昴昭王疑之夫精誠變天地  
而信不喻兩主豈不哀哉今臣盡忠竭誠畢議願知

左右不明卒從吏訛爲世所疑是使荆軻衛先生復起而燕秦不悟也願大王熟察之昔卞和獻寶楚王別之李斯竭忠胡亥極刑是以箕子佯狂接輿避世恐遭此患也願大王察卞和李斯之意而後楚王胡亥之聽毋使臣爲箕子接輿所笑臣聞比干剖心子胥鴟夷臣始不信迺今知之願大王熟察少加憐焉語曰白頭如新傾蓋如故何則知與不知也故樊于期逃秦之燕藉荆軻首以奉丹之事王奢去齊之魏臨城自剄以刦齊而存魏夫王奢樊于期非新于齊

秦而故于燕魏也所以去二國死兩君者行合于志而慕義無窮也是以蘇秦不信於天下爲燕尾生白圭戰亡六城爲魏取中山何則誠有以相知也蘇秦相燕人惡之於王燕王按劍而怒食以駃騠白圭顯于中山人惡之於魏文侯文侯賜以夜光之璧何則兩主二臣剖心析肝相信豈疑於浮辭哉故女無美惡入宮見妒士無賢不肖入朝見嫉昔司馬喜臙脚于宋宰相中山范雎拉脇折齒于魏卒爲應侯此二人者皆信必然之畫捐朋黨之私挾孤獨之交故不

能自免于嫉妬之人也是以申屠狄蹈雍之河徐衍  
負石入海不容于世義不苟取比周于朝以移主上  
之心故百里奚乞食于道路繆公委之以政甯戚飯  
牛于車下桓公任之以國此二人者豈素宦于朝借  
譽于左右然後二主用之哉感于心合于行堅如膠  
漆昆弟不能離豈惑于衆口哉故伯樂生好獨任成  
亂昔魯聽季孫之說逐孔子宋信子罕之計囚墨翟  
夫以孔墨之辯不能免于讒譏而二國以危何則衆  
口鑠金積毀銷骨也是以秦用戎人由余而伯中國

齊用越人子臧而疆威宣此二國豈拘于俗牽于世  
繫阿偏之辭哉公聽並觀垂名當世故意合則胡越  
爲兄弟由余子臧是矣不合則骨肉爲讐敵朱象管  
蔡是矣今人主誠能用齊秦之明後宋魯之聽則五  
伯不足侔而三王易爲比也是以聖王覺悟捐子之  
之心而不說田常之賢封比干之後修孕婦之墓故  
功業覆于天下何則欲善亡厭也夫晉文親其讐而  
疆伯諸侯齊桓用其仇而一匡天下何則慈仁慤勤  
誠加于心不可以虛辭借也至夫秦用商鞅之法東



弱韓魏兵強天下卒車裂之越用大夫種之謀禽勁  
吳而伯中國遂誅其身是以孫叔敖三去相而不悔  
於陵仲子辭三公爲人灌園今人主誠能去驕傲之  
心懷可報之意披心腹見情素墮肝膽施德厚終與  
之窮達無愛於士則桀之犬可使吠堯而跖之客可  
使刺由何況因萬乘之權假聖王之資乎然則荆軻  
湛七族要離燔妻子豈足爲大王道哉臣聞明月之  
珠夜光之璧以闇投人干道路衆莫不按劍相盼者  
何則無因而至前也蟠木根柢輪囷離奇而爲萬乘

器者以左右先爲之容也故無因而至前雖出隋珠  
和璧祗足結怨而不見德故有人先容則枯木朽株  
樹功而不忘今使天下布衣窮居之士身在貧賤雖  
蒙堯舜之術挾伊管之辯懷龍逢比干之意欲盡忠  
當世之君而素無根柢之容雖竭精神欲開忠信輔  
人主之治則人主必襲按劍相盼之迹矣是使布衣  
之士不得爲枯木朽株之資也是以聖王制世御俗  
獨化于陶鈞之上而不牽于卑辭之語不奪于衆多  
之口故秦皇帝在中庶子蒙嘉之言以信荆軻之說

而七首竊發周文王獵涇渭載呂尙而歸以王天下  
秦信左右而亡周用烏集而王何則以其能越拘攣  
之語馳域外之議獨觀乎昭曠之道也今人主沈于  
詔諛之詞牽于帷牆之制使不羈之士與牛驥同皁  
此鮑焦所以忿于世而不留富貴之樂也臣聞盛飾  
入朝者不以私汗義砥厲名號者不以利傷行故里  
名勝母曾子不入邑號朝歌墨子同車今欲使天下  
寥廓之士誘于威重之權脇于勢位之貴回面汗行  
以事詔諛之人而求親近于左右則士有伏死堀穴  
處藪之中耳安有盡忠信而趨闕下者哉

太尉橋公廟碑

蔡邕

橋氏之先出自黃帝帝葬于橋山子孫咸以爲氏漢  
興世以禮樂爲業高祖諱仁位至大鴻臚列名于儒  
林祖侍中廣川相考東萊太守公稟性真純幼有弘  
姿剛而不虐威而不猛聞仁必行睹義斯居文以典  
術守以純固弱冠從政當官而行刺史周公辟舉從  
事所部二千石受取有驗公糾發賊罪致之于理時  
有椒房貴戚之託周公累息公不爲之動史魚之勁

直山甫之不阿於是始形舉孝廉除郎中洛陽左尉  
特進穎王梁不疑爲河南尹當事以對是時畏其權  
寵而爲屈辱者多矣公不折節解印綬去辟司徒舉  
高第補侍御史以詔書考司隸校尉趙邠事廷尉郭  
貞私與公書非接使銜命之儀公封書以聞貞以文  
章得用鬼薪公離司寇辟大將軍梁公幕府屢以救  
正干其隆指將軍嘉之無言不讐又以高第補侍御  
史在職旬月西羌匪茹震驚隴漢西府舉公拜涼州  
刺史威名克宣凶頑革心清風席卷至則無事車師

後部阿羅多卑君相與爭國興兵作亂公遣從事牛  
稱何傳舉輕騎奉辭責罪收阿羅多卑君繫燉煌正  
處以聞阿羅多爲王卑君侯稱以奉使副指除侯部  
不動干戈揮鞭而定西域之事人以爲美談又值饑  
荒諸郡飢餒公開倉廩以貸救其命主者以爲舊典  
宜先請公曰若先請民已死廩訖乃上之詔報曰邊  
穀不得妄出立擅出於是立有汲黯憂民之心後不  
以爲常公達于事情剖斷不疑皆此類也遷齊相視  
民如保赤子討惡若赴水火刑明賞遂民知勸懼臨

淄令賂財賊多罪正受鞫就刑沒齒無怨竟以不先請免官徵拜上谷太守民有父子俱行凶人人惡言當道曉之不止其子殺之而捕得公以其見悔辦直不舉文書以遇赦令蕃縣有帝舜廟以故事齊祠戶曹史張機有懲罰貨祠巫自託以舜命約公云不得譴公覺其奸態收考首伏卽日伏辜遷漢陽太守上邽令皇甫禎賊罪明審收考髡鉗死於冀市後以病去徵拜議郎司徒長史循王悝桓帝同產以懷道謀黜封瘿陶王以公長子襟帶拜鉅鹿太守悝畏布明

憲檢于靜息自將作大匠徵未到而章謗先入故轉拜議郎遂用免官徵度遼將軍遷河南尹少府大鴻臚司徒司空託病而去悉引衆災雖非己負公皆以自劾遜位歲餘拜尙書令時河間相蓋升以朝廷在藩國時鄰近舊恩歷河南太守太中大夫在郡受取數億以上創毒深刻公表升貪放狼籍不顧天網捐辱國家爲上招怨當肆市朝以謝兆民幸遇贖令罪除惡在可免升官禁錮終身沒入財賂非法之物以充帑藏懲戒羣下連表上不納而升遷爲侍中公稱

商邱縣志 卷之十三  
病辭徒拜光祿大夫復拜太尉如前遜位復拜少府  
病不就職拜太中大夫凡所獲祿皆公府所特表選  
臨難受位自九列之後乃以丕勲公紀綱張弛勇決  
不同是非明作速于察機燕居從容申申天天和樂  
寬裕愛士親仁凡見公容貌聞公聲音莫不熙怡悅  
懌思樂模則來者忘歸去者願還雅性謙克不吝于  
利欲雖眾子羣孫並在仕次曾無順媚一言之求良  
沒之日無獲大位在百里者莫得好縣北方公孫未  
有若茲者也初公爲舍于舊里弟卒推與其孤至于

卽世柩殯無所清儉仁與之效於斯爲著巍巍若德  
允世之表儀也已公諱玄字公祖少辟孝廉辟司徒  
大將軍府爲侍御史牧一州典五郡出將邊營入掌  
機密歷三卿同三司享年七十五光祿七年夏五月  
甲寅以太中大夫薨于京師朝廷所以弔贈如前傳  
之儀九月乙酉葬于某所三孤故臣門人相與述公  
言行咨度禮制文德銘于三鼎武功勒于正鉞官簿  
次第事之實錄書于碑陰俾爾昆裔永有仰于碑陰  
云光光烈考伊漢元公克明克哲實獻實聽如淵之

浚如岳之嵩威壯號虎文繁雕龍撫柔疆垂遠邇率  
從敷教中夏五典攸通帝謂我后朕嘉君功命君三  
事時亮天工公拜稽首翼翼惟恭左右天子祗厥勳  
庸庶績既熙黎民時雍上下謐甯八方和同丕顯伊  
德作憲萬邦

祭橋立文

曹植

惟公懿德高軌汎愛博容國念明訓士思令謨幽靈  
潛翳邈哉緬矣操以幼年遠升堂室特以頑質見納  
君子增榮益觀皆由獎勗猶仲尼稱不如顏淵李生  
厚嘆賈復士死知己懷此無忘又承從容約誓之言  
殂沒之後路有經由不以斗酒隻鷄過相沃醑車過  
三步腹痛勿怨雖臨時戲笑之言非至親之篤好胡  
肯爲此辭哉懷舊惟故念之悽愴奉命東征屯次鄉  
里北望貴土乃心陵墓裁致薄奠公共享之

魏

帝學贊

曹植

祖自軒轅立囂之裔生言其名木德治世撫甯天地  
神聖靈賓教訖四海明並日月

唐

謝金吾將軍表

張巡

想峨眉之碧峯豫遊西蜀追駭駟于玄圃保壽南山  
逆賊祿山殺戮黎獻糝汗闕庭臣被圍四十七日凡  
二千八百餘戰主辱臣死當臣效命之時惡稔罪盈  
是賊滅亡之日

宋州八關齋會報德記

顏真卿

夫德之所感淪骨髓而非深誠之所至去神明而何  
遠有唐大厯壬子歲宋州八關齋會者此都人士衆

文武將吏朝散大夫使持節宋州諸軍事行宋州刺  
史兼侍御史本州團練守捉使賜紫金魚袋徐向等  
奉爲河南節度觀察使開府儀同三司太子太師左  
右僕射知省事兼御史大夫汴州刺史上柱國信都  
郡王田公頃疾良已之所建也公名神功冀州南宮  
人稟元和之粹靈應期運以傑出含弘厚下正直率  
先起孝而德感生人竭忠而精貫白日和衆必資于  
寬簡安人務在于撫柔况乎武藝絕倫英謀沉祕所  
向而前無強敵日新而學有緝熙故能奠天子之邦

鬱蒼生之望有日矣安史構逆公以平盧節將佐今  
右僕射李公忠臣收滄德攻相州拒杏園守陳留許  
叔冀降而陷焉思明懼忠臣圖已令公佐南德信隨  
劉從諫收江淮至宋州欲襲李銑公斬德信走從諫  
遂并其衆而報焉肅宗大悅拜公鴻臚卿再襲敬釭  
于鄆州加中丞討劉展于潤州斬平之遷徐州刺史  
明年拜淄青節度使屬侯希逸自平盧至公以州讓  
之時宋州刺史李岑爲賊所圍副元帥李光弼請公  
討平之拜御史大夫加開府充鄆節度使破法子營  
又討敬釭釭歸順史朝義聞之奔下博投范陽自縊  
死廣德元年授戶部尙書封信都郡王上幸陝公首  
末扈從都知六軍兵馬每食宿公皆躬自省視上感  
焉方委以政事公涕泣固辭而止二年拜汴宋節度  
遷兵部大厯二年加公右僕射封信都郡王上幸陝公首  
國太夫人妻信安郡王禕女爲涼國夫人慈和勤儉  
睦于親黨公性純孝居常不離左右閱讀書史或時  
疾病公輒累月不茹葷家中禮懺不絕仍造崇夏弘  
聖二寺以祈福祐五年兼左僕射知省事加太子太



師公德厚量深勞謙重慎功既高而心益下位彌大而禮益恭故遠無不懷邇無不肅今夏四月忽嬰熱疾沉頓累旬積善降祥勿藥遄喜鷹犬之玩悉皆棄捨羣帥感焉無復弋獵四履之內感懷歡忻睢陽之人踴躍尤甚乃咨于州將曰昔我公之陷賊也至敝邑而首誅德信李岑之見圍也破其黨而克保城也

是卽我公大造于敝邑也微我公之救恤則皆死于鋒鏑入于煎熬矣尙何能保完家室嬉戲鄉井者不資齋明何以報德徐君悅而從之來歲五月八日首以俸錢三十萬設八關大會飯千僧于開元伽藍將佐爭承惟恐居後已而州縣官吏長史苗藏實等設一千五百人爲一會鎮遏團練官副使孫琳等設五百人爲一會耆壽百姓張烈等設五千人爲一會法筵等供仄塞于郊垆贊唄香花喧填于晝夜其餘鄉村聚落來往舟車聞風而靡督自勤懇惠而怵先胥懋者又不可勝數矣非夫美政淳深德風汪濊則何以感人若此其至者乎眞卿等叨接好仁飽承餘烈覩茲美盛益覩求蒙若不垂諸將來則記事者奚

述

微子廟碑

賈至

昔者高宗既歿殷始錯命政有數倫敗紀事有梗神  
虐天迄于獨夫積慝乃稔武庚不化茅土再血玄鳥  
之祀宜其忽諸噫湯之德不衰故微子復興于宋矣  
微子名啟實帝乙元子帝乙惜賢之故而神器不集  
于君君肅恭神人恪慎克孝才兼八元之偉德首三  
仁之列始在擇嗣箕子贊焉尹茲東夏周公嘉  
而不朽仲尼稱焉覩其進思盡忠則忤主以竭諫退

將保飛則全身以逃難去就生死之途沉吟出處之  
域有以見聖達之情也若乃受爲不道暴殄天物剖  
諫輔之心解忠良之骨億兆墜于塗炭宗祧困于艱  
危而君崎嶇險阻避迹藏時免身龍戰之郊解縛鷹  
揚之帥卒能修復舊物統承先祀七百餘年歆我神  
祇非明德至仁其能孰與于此於戲國之興亡不獨  
天命向使帝乙捨受而立啟前箕子而後少師則文  
王未可專征于諸侯武王未可誓師于牧野雖周公  
之聖不過子產之相矣太公之賢不過穰苴之法矣

是太王立季歷而昌帝乙捨微子而亡成敗繫大不  
其昭彰乎皇帝二十有一載予作吏于宋思其先聖  
遺事求于古老輿人則得君之祠廟存焉盛衰紛綸  
年祠超忽喬木老矣靈儀儼然檀欒茨暨者月繼蘋  
蘩牲幣者日接何百代之後而仁風獨揚乎留連廟  
庭乃作頌曰天革元命皇符在木立天降災上慘下  
黷人怨神怒川崩鬼哭赫赫周邦如臨深谷邊矣微  
子逢時顛沛居亡念存處否求泰諫以明節仁而遠  
害作諾父師全身而退龍戰于野鳥焚其巢桓桓周  
王奄有商郊面縛就執牽平投庖祀商修器啟宋分  
茅嗟爾宋人來蘇是仰穆如雨潤露若春養以戴以  
翼是宗是長茫茫舊封千載餘燬我來祠廟永挹遺  
芬荒堦蔓草古木垂雲惆悵懷賢徘徊日曛鐫石紀  
德川流斯文

張中丞傳後序

韓愈

元和二年四月十三日愈與吳郡張籍聞家中舊書  
得李翰所爲張巡傳翰以文章自名爲此傳頗詳密  
然尙恨有闕者不爲許遠立傳又不載雷萬春事首

尾遠雖材若不及巡者開門納巡位本在巡上投之  
柄而處其下無所疑忌竟與巡俱守死成功名城陷  
而遠與巡死先後異耳兩家子弟材智下不能通知  
二父志以爲巡死而遠就寇疑畏死而辭服于賊遠  
誠畏死何苦守尺寸之地食其所愛之肉以與賊抗  
而不降乎當其圍守時外無蚍蜉蟻子之援所欲忠  
者國與主耳而賊語以國亡主滅遠見救援不至而  
賊來益衆必以其言爲信外無待而猶死守人相食  
且盡雖愚人亦能數日而知死處矣遠之不畏死亦

明矣烏有城壞其徒俱死獨蒙愧恥求活雖至愚者  
不忍爲嗚呼而謂遠之賢而爲之耶說者又謂遠與  
巡分城而守城之陷自遠分所始以此誦遠又與兒  
輩之見無異人之將死其臟腑必有先受其病者引  
繩而絕之其絕必有處觀者見其然從而尤之其亦  
不達于理矣小人之好議論不樂成人之美如是哉  
如巡遠之所成就如此卓卓猶不得免其他則又何  
說當二公之初守也甯能知人之卒不救棄城而逆  
遁苟此不能守雖避之他處何益及其無救而且窮

也將其創殘餓羸之餘雖欲去不能達二公之賢其  
講之精矣守一城捍天下以千百就盡之卒戰百萬  
日滋之師蔽遮江淮沮遏其勢天下之不亡其誰之  
功也當是時棄城而圖存者不可一二數擅強兵坐  
而觀者相環也不追議此而責二公以死守亦見其  
自比於逆亂設淫辭而助之攻也愈嘗從事于汴徐  
二府屢道于兩府間親祭于其所謂雙廟者其老人  
往往說巡遠時事云南霽雲之乞救于賀蘭也賀蘭  
嫉巡遠之聲威功績出已上不肯出師救愛霽雲之

勇且壯不聽其語強留之具食與樂延霽雲坐霽雲  
慷慨語曰雲來時睢陽之人不粒食月餘矣雲雖欲  
獨食義不忍雖食且不下咽因拔所佩刀斷一指血  
淋漓以示賀蘭一座大驚皆感激爲雲泣下雲知賀  
蘭終無爲雲出師意卽馳去將出城抽矢射佛寺浮  
圖矢著其上靼半箭曰吾歸破賊必滅賀蘭此矢所  
以志也愈貞元中過泗州船上人猶指以相語城陷  
賊以刃脇降巡不屈節卽牽去將斬之又降霽雲未  
應巡呼曰南八男兒死耳不可爲不義屈雲笑曰欲

將有爲也公有言雲敢不死卽不屈張籍曰有于嵩者少依于巡及巡起事嵩嘗在圍中籍大厯中于和州烏江縣見嵩嵩時年六十餘矣以巡初嘗得臨渙縣尉好學無所不讀籍時尙小粗問巡遠事不能細也云巡長七尺餘鬚髯若神嘗見嵩讀漢書謂嵩曰何爲久讀此日未熟也巡曰吾于書讀不過三遍終身不忘也因誦嵩所讀書盡卷不錯一字嵩驚以爲偶熟此卷因亂抽他帙以試無不盡然嵩又取架上他書試以問巡巡應口誦無疑嵩從巡久亦不見巡

嘗讀書爲文章操紙筆立書未嘗起草初守睢陽時士卒僅萬人城中居人戶亦且數萬巡因一見問姓名其後無不識者巡怒鬚髯輒張及陷賊縛巡等數十人坐且將戮巡起旋其衆見巡起或走或泣巡曰汝勿怖死命也衆泣不能仰視巡就戮時顏色不亂陽陽如平生遠寬厚長者貌如其心與巡同年生月日後于巡呼巡爲兄死時年四十九嵩貞元中死于亳宋間或傳嵩有田在亳宋間武人奪而有之嵩將詣州訟理爲所殺嵩無子張籍云

進御史中丞張巡傳表

李翰

臣聞聖主褒死難之士育死事之孤或親推轎車或  
追建封邑厚死有以慰生撫存有以答亡然後君臣  
之義貫以生死激勸之道著于存亡君所以不遺于  
臣臣所以不背其君君恩臣節于是乎立伏見故御  
史中丞贈揚州大都督張巡生于昌時少習儒訓屬  
阿鞏構亂凶虐滔天挺身下位忠勇奮發率烏合之  
衆當漁陽之鋒賊時竊據洛陽控引幽朔驅其猛銳  
吞噬河南巡前守雍丘潰其心腹及魯昱以十萬之

師棄甲于宛葉哥舒以天下之衆敗績于潼關兩宮  
出居萬國播蕩賊遂僭盜神器鳴時兩京南臨漢江  
西逼岐雍羣帥遷延而不進列郡望風而出奔而巡  
獨守孤城不爲之却賊乃遶出巡後議圖江淮巡退  
軍睢陽扼其咽喉領前後相守自春徂冬大戰數十小  
戰數百以少擊衆以弱制強出奇無窮制勝如神殺  
其兇醜凡十一萬賊所以不敢越睢陽而取江淮江  
淮所以保全者巡之力也城孤糧盡外救不至猶奮  
羸起病摧鋒陷堅俾三軍之士噉膚而食知死不叛

及城陷見執終無撓詞顧叱兇徒精貫白日雖古之忠烈何以加焉伏以光天文武大聖孝皇帝陛下聰明文思睿哲神武提一旅之眾復配天之業賞功褒節大賚羣臣遂贈揚州官及其子此誠陛下發德音之美也而議者或罪巡以食人愚巡以守死臣竊痛之今特詳其本末以辨巡過以塞眾口惟聖聰鑒焉臣聞人稟教以立身刑原情而定罪故事有虧教則人道不列刑有非罪則王法不加忠者臣之教恕者法之情今巡握節而死非虧教也析骸而爨非本情

也春秋之義以功覆過咎繇之典容過宥刑大易之戒遏過揚善爲國之體錄瑜棄瑕今眾議巡罪是廢君臣之教細忠義之節不以功掩過不以刑恕情善遏惡揚瑕錄瑜棄非所以獎人倫明勸戒也且其時大臣將相從逆比肩而巡朝廷不登坐宴不與不階一伍之眾不假一節之權威肅義旅奮身死節此巡之忠大矣賊勢憑陵連兵百萬巡以數千之眾橫而制之若無巡則無睢陽無睢陽則無江淮賊若因江淮之資兵彌廣財彌積根結盤據西向以拒王師雖



終于殲夷而曠日持久國家以六師震其西巡以堅壘扼其東故陝郿一戰而兇逆遁走王師因之而勢勝聲勢纔接而城陷此天意使巡保江淮以待陛下之師師至而巡死也巡之功大矣古昔列國諸侯或相侵伐猶有分災救患之義况諸將同受國恩奉辭伐罪乎巡所以固守者非惟懷獨克之志亦以恃諸軍之救救不至而食盡食既盡而食人乖其本圖非其素志則巡之情可求矣設使巡守城之初已有食人之計損數百之衆以全天下臣猶曰功過相淹况

非其素志乎在周典之三宥其一曰宥過失故語巡之忠則可以敦世教議巡之功則可以繫國祚原巡之情則可以宥過失昔夫子作春秋明褒貶齊桓將封禪略而不書晉文公召王河陽書而諱之蓋以匡戴之功大可以掩僭禪之過也今巡蒼黃之罪輕于僭禪興復之功重于匡戴罪疑惟輕功疑惟重聖人之訓昭然可徵臣故謂巡者足可以爲訓矣臣又聞罰不及嗣賞延于世此三代所以直道而行今巡子亞夫雖受一官不免飢寒之患江淮既巡所保戶口

充完臣謂宜封以百戶俾食其子臣又聞強死爲厲  
游魂爲變有所歸往不爲災巡旣身首支離將士等  
骸骨不掩臣謂宜于睢陽城北擇一高原招魂葬送  
巡并將士大作一墓而葬使九原之魂猶思效命三  
軍之衆有以輕生旣感幽明且無冤厲亦國家忘過  
旌善垂誠百世之義也臣少與巡游巡之平生臣所  
悉知今巡死大難不覩休明惟期令名是其榮祿若  
不時紀錄日月寢悠或掩而不傳或傳而不實而巡  
生死不遇誠可悲焉臣敢採所聞得其親覩撰傳一

卷昧死獻上伏惟陛下大明在上廣運臨下仁遐之  
德洽于艱難有善必紀無微不錄倘以臣所撰編列  
史官雖退死丘壑骨而不朽

燕而城州大都督南府君睢陽廟碑 柳宗元

急病讓夷義之先圖國忘死貞之大利合而動乃市  
賈之相求恩加而感則報施之常道睢陽所以不階  
王命橫絕凶威超千祀而挺生奮百代而特立者也  
時惟南公天與拳勇神資機智藝窮百中豪出千人  
不遇興詞鬱龍眉之都尉數奇見惜挫援臂之將軍

天寶末寇劇憑陵隳突河華天旋虜斗極之位地圯  
積狐狸之穴親賢在庭子駿陳謨以佐命元老用武  
夷甫委師而勸進惟公與南陽張公巡高陽許公遠  
義氣懸合許謨大同誓鳩武旅以遏橫潰裂裳而千  
里來應左袒而一呼皆至柱厲不知而死難狼臆見  
黜而奔師忠謀朗然萬夫齊力公以推讓且專奮擊  
爲馬軍兵馬使出戰則羣校同強入守而百雉齊固  
初據雍丘謂非要害將保江淮之臣庶通南北之奏  
復拔我義類扼于睢陽前後捕斬要遮凶氣連沮漢

兵已絕守疏勒而彌堅寇騎雖強頓肝眙而不進賊  
徒乃棄疾于我悉衆合圍技雖窮于九攻志益專于  
三坂偪陽懸布之勁汧城鑿穴之奇息意牽羊差鄭  
師之大臨甘心易子鄙宋臣之病告諸侯環顧而莫  
救國命阻絕而無歸以有盡之疲人敵無己之強寇  
公乃躍馬濱圍馳出萬衆抵賀蘭進明乞師進明乃  
張樂侑食以好聘待之公曰敝邑父子相食而君辱  
以燕禮獨何心歟乃自噬其指曰噉此足矣遂痛哭  
而返卽死孤城首碎秦庭終懵無衣之賦身離楚野

徒傷帶劍之辭至德二年十月城陷遇害無傳燹之  
嘆息有周苛之慷慨聞義能徙果其初心烈士抗辭  
痛臧洪之同日直臣致憤惜蔡恭于累旬朝廷加贈  
特進揚州都督定公爲第一等與張氏許氏並立廟  
睢陽歲時致祭男在襁褓皆受顯秩賜之田土葬刻  
鮑信之形陵圖龐德之狀納官其子見勾踐之心羽  
林字孤知孝武之志舉明關于周典徵印綬于漢儀  
王猷以光寵錫斯備於戲睢陽之事不惟以能死爲  
勇善守爲功所以出奇以挫敵立權以怒寇俾其專

力于東南而去備于西北力專則堅城必陷備去則  
天討可行是故卽城陷之辰爲克敵之日世徒知力  
保于江淮而不知功靖乎逆醜論者或求之思與公  
諱霽雲字某范陽人有子曰承嗣七歲爲婺州別駕  
乃賜緋魚袋歷施涪二州服忠思孝無替負荷懼祠  
宇久遠德音不形願斲堅石假詞紀美惟公信以許  
其友剛以固其志仁以殘其肌勇以振其氣忠以挫  
其敵烈以死其事出乎內者合于貞行乎外者貫于  
義是其所以奮百代而超千祀者矣其志不亦宜乎

廟貌思存碑表攸託洛陽城下思鄉之夢儻來麒麟閣中卽圖之辭可繼銘曰

貞以圖國義惟急病臨難忘身見危致命漢寵死事周崇死政烈烈南公忠出其性控扼地利奮揚其柄東護吳楚西憐周鄭焚焚羣凶害氣彌盛長蛇封豕踴躍不定屹彼睢陽制其要領橫潰不流疾風斯勁梯衝外侮缶穴中偵鈴馬非艱析骸猶競浩浩烈士不聞齊師兵食殲焉守逾三時公奮其勇單車載馳投驅無告壘指而歸力窮款執猶抗其辭圭璧可碎

堅貞不虧寇力東盡凶威西惡孤城旣拔渠魁受戮雷霆之誅由我而速巢穴之固由我而覆江漢淮湖羣生成育倬焉勲烈孰與齊躡天子震悼陟是元功旌褒有加命秩斯崇位尊九牧禮視三公建茲祠宇式是形容牲牢伊碩黍稷伊豐虔虔孝嗣望慕無窮刊碑河許萬古英風

還京次睢陽祭張巡許遠文

高適

維乾元元年五月日太子詹事御史中丞高適謹以清酌之奠敬祭于故御史中丞張許二公之靈中丞

體質真正才掩羣豪詩書自負州縣徒勞惆悵雄筆  
辛勤寶刀時平位下世亂節高賊臣通逆國步驚搔  
兩河震恐千里嗷嗷投袂洒泣據鞍鬱陶全譙入宋  
牧梓捍曹心繫魏闕志清武牢帝曰嗟爾龍光豹韜  
憲臺戎幕持斧擁旄嗚呼予亦忝竊統茲介冑俄俸  
短書至夔狂寇裹糧訓卒達曙通晝軍乃促程書亦  
封奏遂發驕勇俾驅鳥獸將無還心兵亦死關賊黨  
頻蹙我師旋漏十城相望百里不抹紘紘嘯聚兵鋒  
亦奏積薪爲梁決岸成竇嗚呼當此虎敵豈無強隣

常時肝膽今日越秦堅守半歲絕糧數旬柿椽秣馬  
煮紙均人病不暇拯歿無全身煎熬甲冑啄嚙膠筋  
謙慨險艱淒涼苦辛嗚呼我辭淮楚將赴伊洛途出  
茲邦悲纏舊郭邑里灰燼城池墟落何九拒之崢嶸  
皆二賢之制作聲蓋天壤氣橫遼廓讓死爭先臨危  
靡却嗚呼天亦難論萬夫開壁一旅纔存衰羸旣竭  
力弱相吞陷穽織路梯衡棧門土濠水合木柵雲屯  
居卽其敝突無其奔烟雲劍戟逼則紛昏與求生而  
害義甯抗節以埋魂嗚呼悖逆殲潰干戈將止海岳

澄清朝廷邳理封功列爵懷黃拖紫傷哉二賢不預  
于此吁嗟孀婦伶俜愛子追贈方榮賞延茲始寂寂  
梁苑悠悠睢水黃蒿連接白骨填委思壯志于冥冥  
問遺形于荆杞列祭空城一悲永矣

HARVARD COLLEGE LIBRARY  
FROM THE  
HARVARD-YENCHING  
INSTITUTE

SEP 30 1928